


UC SOUTHERN REGIONAL LIBRARY FACILITY  
A  
X  
0  
0  
0  
1  
6  
0  
5  
9  
5  
5

California  
Regional  
Library

*Vartan Derad*

~~469~~  
69





Թի- 8 Հրատարակութիւն Ս. Դ. Հնչ. Կառ. Աճեբ. Գործ. Յանչ. - Է

---

# ՆՈՐԱԳՈՅՆ ՍԱՀՄԱՆԱԴՐԱԿԱՆ ԻՐԱԿՈՒՆՔԸ

ԴՐԵՑ

Ե. ՍԱՖՕ

(Ս. ՄՈՒՐԱՏԵԱՆ)



ԳՐՕՎԻՏԻՆՍ

Տպարան «ԵՐԻՑԱՍԱՐԴ ՇԱՅԱՍՏԱՆ»-ի

1914



## Յ Ա Ռ Ա Ջ Ա Բ Ա Ն

Ներկայ քոչիւրով մեր նպատակն է ընթերցող հասարակութեան ցոյց տալ նորագոյն սահմանադրական իրաւունքի մի շարք սկզբունքները, որոնք արդէն կիրարկուած են եւ կամ կիրարկուելու վրայ են Արեւմտեան Եւրոպայի եւ Ամերիկայի հասարակապետութիւնների մէջ:

Դժբաղդաբար, մեր մէջ շատ քիչերը ծանօթ են քաղաքական-սահմանադրական հարցերին եւ դա գլխաւորապէս բացատրում է այն իրողութեամբ, որ մեզ շրջապատող քաղաքական, քաղաքական կաշկանդող միջավայրը հնարաւորութիւն չէ տեսնուանասիրելու: Մանուշի էջերում, հրատարակային ժողովներում ամեն օր խօսում է պետութեան, ազգի, կառավարութեան, սահմանադրութեան, պարլամենտի, քիչ իրաւունքի, քաղաքական-քաղաքական ազատութիւնների մասին եւ, սակայն, շատերը դեռ որոշ. մեկին, յստակ գաղափար չունեն քաղաքական այդ հաստատութիւնների մասին:

Ամերիկահայ գաղութը, գլխաւորապէս, մինչեւ այսօր գուրկ է եղել այդ հարցերի շուտաբանութիւնից: Եւ շատ քիչ անգամ պատեհութիւն է ունեցել կարողալ կամ շեղ քաղաքական-սոցիալական բնաւորութիւն ու ինտուս ունեցող շուրջ գրեւծներ ու ասեմախօսութիւններ: Ազգայնական դիմագոգիան հակառակ է եղել միշտ այդ կարգի հարցեր շօշափելուն եւ աշխատել է, որքան կարելի է, շահագործել ժողովրդի փափուկ զգացումները:

Անեն մի ժողովուրդ, եւս արեւի հայ ժողո-

վորդը, իր ազգային, ֆաղափական եւ ֆաղափացիական իրաւունքների պաշտպանութեան տեսակէտից պէտք է ուսումնասիրէ սահմանադրական-ֆաղափական հարցերը եւ առհասարակ այն սկզբունքները, որոնց վրայ հիմնւած են Եւրոպայի եւ Ամերիկայի ֆաղափական կազմակերպութիւնները: Նա պէտք է անհրաժեշտօրէն զիտակցութիւն ունենայ իր իրաւունքների ու պարտականութեանց մասին, որպէսզի կարողանայ աւելի յաղթականօրէն պայքարել բռնապետութեան, կեղեքումի ու հարստահարութեան դէմ իր ղեկով:

Այսի առաջ ունենալով, ուրեւն, սահմանադրական-ֆաղափական հարցերի եզրական կարեւորութիւնը, մենք յոյս ենք ընծայում ներկայ քոչիւրը, որ հրատարակւած է 1909 թիւն, 4. Պոլսում «Կոնակ» շաբաթաթերթի մէջ, Ս. Մուրատեան ստորագրութեամբ: Ինչ-ինչ մասերում մենք յաւելումներ ենք արել, արձարծւած խնդիրները աւելի որոշ կերպով շուսարանելու համար:

Ե . ՍԱՅՕ



# ՆՈՐԱԳՈՅՆ

## ՍԱՀՄԱՆԱԴՐԱԿԱՆ ԻՐԱԽՈՒՆՔԸ

Ի՞նչ է պետութիւնը, — Սօցիալիստական եւ բուրժուական տեսակէտները նրա մասին. — Ազգութիւն եւ Միջազգայնութիւն. — Պետութեան ձեւերը. — Ի՞նչ է կառավարութիւնը, կառավարութեան ձեւերը. — Ի՞նչ է սահմանադրութիւնը, սահմանադրական բարժումները. — Նորագոյն սահմանադրական իրաւունքի մի քանի հիմնական սկզբունքները. — Ժողովրդական միահեծանութիւն, գաղտնի, ուղղակի, ընդհանուր եւ հաւասար ձայնաւորութեան ելլանակ, համեմատական ներկայացուցչութիւն, ժողովրդական վերահսկողութիւն. — Իշխանութիւնների բաժանում, Օրէնսդիր, գործադիր եւ դատաստանական իշխանութիւններ. — Քաղաքական-քաղաքացիական ազատութիւններ:

*Ի՞նչ է պետութիւնը. — Պետութեան մասին ներկայումս տիրապետում են երկու որոշ և առանձին տեսակէտներ, մէկը սօցիալիստական իսկ միւսը բուրժուա-սպաստամտական :*

*Սօցիալիզմի տեսակէտով պետութիւնը ընկերային այն ոյժն է, որ ծնունդ լինելով մասնաւոր սեփականատիրութեան, նպատակ ունի պահպանել դասակարգային բաժանումները :*

Այն օրից, երբ արտադրութեան և հարստութեան գործիքները մասնաւոր սեփականութիւն դարձան մարդկանց մի խմբի, դասակարգութեան, այդ օրից ծնունդ առաւ պետութիւնը: Ընկերային այդ առանձնաշնորհեալ դասակարգը ստեղծեց պետութիւնը որպէս քաղաքական և ոստիկանական կազմակերպութիւն, որի միջոցով նա ձգտեց ապահովել իր դասակարգային տիրապետութիւնը այն դասակարգի վրայ, որ անմասն մնաց ընկերային հարըստութիւնից: Եւ եթէ մենք մի ակնարկ նետենք պատմութեան վրայ, կը տեսնենք, որ պետութիւնը իր ծագման օրից մինչև այսօր պաշտպանել է հարուստ, սեփականատէր դասակարգի շահերը ընդդէմ աղքատ, ընչազուրկ դասակարգի: Հին Աթէնքի և Հռոմի մէջ, պետութիւնը կազմուած էր այն ժամաւաւակայ սեփականատէր դասակարգից, աղնւականութիւնից և պաշտպանուած էր նրա շահերը ընդդէմ սեփականազուրկ դասակարգի, որ գերիներն էին: Աթէնքում սեփականատէր դասակարգը կազմուած էին Խոյասրիդները, իսկ սեփականազուրկ դասակարգը՝ գեոլորները և դեմոկրատները: Հռոմում պատրիկեաններն էին սեփականատէր դասակարգը իսկ պլեբեանները՝ սեփականազուրկ դասակարգը:

Միջին դարում պետութիւնը կազմուած էր աւատապետներից և պաշտպանուած էր նրանց շահերը ընդդէմ ճորտերի: Իսկ ներկայ դարում, պետութիւնը իր ամբողջ օրէնսդրական, դատական և զինւորական կազմով պաշտպանուած է բուրժուա դասակարգի շահերը ընդդէմ պրոլետար, բան: որ դասակարգի:

Եւ որովհետև պետութիւնը ծնունդ լինելով մասնաւոր սեփականատիրութեան, սկզբից ի վեր

պաշտօն է ունեցել պահել դասակարգային առանձնաշնորհումները, ուստի սօցիալիստները կարծիքով, պետութիւնը պիտի վերանայ, անհետանայ այն օրը, երբ արդի տնտեսական անհաւասարութեան ու անարդարութեան ընդհանրացումը յաջորդէ ընկերային հաւասարութեան ու եղբայրութեան իրաւակարգը, ուր բնութեան բոլոր բարիքները ընդհանուրի սեփականութիւնը դառնալով՝ պիտի իրականանայ մեծ փիլիսոփայի այն իդէալը թէ՛ մէկը ամենքի համար է և ամենքը մէկի համար: Սօցիալիստական տեսակէտով, ուրեմն, երբ արդի մասնաւոր սեփականատիրութիւնը և դասակարգային բաժանումները վերանան ու թագաւորէ համայնական սեփականատիրութիւնը և ընկերային գործակցութեան ընդհանրացումը, այդ օրը պետութիւնը՝ որպէս քաղաքական և տնտեսական տիրապետութեան մի գործիք՝ պիտի վերանայ իր կարգին և դառնայ միայն թանգարանների մի զարդ, ինչպէս ասոււմ է սօցիալիզմի հայրերից մէկը՝ Ֆրէդրիխ Էնգէլսը (1):

Բուրժուա-ազատամտական տեսակէտով, պետութիւնը մի երկրի մէջ ապրող ազգի կամ ազգերի

---

(1) Տես Ֆրէդրիխ Էնգէլս՝ L' Origine de la propriete, de la Famille et de l'Etat. Ապագայ սօցիալիստական իրաւակարգի մէջ պետութիւնը գոյութիւն կունենայ, բայց այդ պետութիւնը արդի քաղաքական կազմակերպութիւնը չի լինիլ. որը ինչպէս ասացինք, սօցիալիստների կարծիքով պիտի անհետանայ, այլ տնտեսական մի վարչութիւն, որ աշխատանքը պիտի բաժանէ ընկերութեան անդամների միջև և ապահովէ արտադրութիւնների արդար բաշխումը:

կողմից կազմւած քաղաքական ընկերակցութիւնն է, ուրիշ խօսքով՝ նա իրաւական անձնաւորումն է նոյն երկրի ազգի կամ ազգերի:

Գետութեան նպատակի և առաքելութեան մասին զանազան փիլիսոփաներ զանազան կարծիքներ են տւել, նայելով թէ՛ որ ուղղութեան են պատկանում իրանք: Կանտի, Ֆիխտէի, Հումբոլդի, Մակօլէի կարծիքով՝ պետութեան նպատակն է երաշխաւորել անհատի իրաւունքները: Դա անհատապաշտական (individualiste) դպրոցի տեսակէտն է: Բլունչի կարծիքով՝ պետութեան «ճշմարիտ և ուղղակի նպատակն է ազգի կարողութիւնների զարգացումը, նրա կեանքի կատարելագործումը յառաջատուական մի այնպիսի ճանապարհով, որ նոյն այդ ազգին հակասութեան մէջ չդնէ մարդկութեան ճակատագրի հետ, յարգէ բարոյական և քաղաքական պարտականութիւնը», ուրիշ խօսքով՝ Բլունչին ուշում է ասել, որ պետութիւնը պէտք է հետապնդէ ազգի բարոյական, մտաւորական և անտեսական բարգաւաճումը, առանց վնասելու ընդհանուրի, մարդկութեան շահերին: Քէսնէի, էմիլ Լավըլէի և ուրիշների կարծիքով, պետութեան էական նպատակն է իրաւունքը գործադրել. նա պէտք է միջամտէ ընկերային բոլոր յարաբերութիւնների մէջ և վերացնէ անիրաւութիւնները, որոնք անցեալի ժառանգութիւնն են: Սա նորագոյն քաղաքագիտական դպրոցի (interventionniste) տեսակէտն է:

Եթէ պետութիւնը մի երկրի մէջ գտնւող ազգի կամ ազգերի քաղաքական կազմակերպութիւնն է, ապա հարց է ծագում թէ՛ ի՞նչ է ազգը:

Ազգ է կազմում ընկերային այն համախմբութիւնը, որ ունի միևնոյն պատմական ծագումը,

միևնոյն լեզուն, բարքերը, աւանդութիւնները, գրականութիւնը, կուլտուրան :

Սկզբում ցեղային նոյնութիւնը քաղաքական միութեան հիփքն էր կազմում: Միևնոյն ցեղին պատկանողները իրանց համար քաղաքական առանձին կեանք էին ստեղծում: Բայց երբ տնտեսական կեանքը զարգացաւ և հողը դարձաւ մասնաւոր սեփականութիւն, այն ժամանակ պատերազմները, նըւաճումներն ու գաղթականութիւնները իրար հետ կողք-կողքի բերին այնպիսի ազգաբնակչութիւններ, որոնք տարբեր ցեղագրական ծագում ունէին: Յեղային ինքնութիւնը այլևս քաղաքական միութեան հիմք չձառայեց, տարբեր ցեղագրական միութիւններ հստակեցրան մի վեհապետի, Այդպէս եղաւ, օրինակ, ասորական, պարսկական, յունական և հռովմէական կայսրութիւնների օրով:

Ազգային հարցը իր արդիական իմաստն ու նըւշանակութիւնը ստացել է Ֆրանսիական Յեղափոխութիւնից ի վեր, որ անհատի անձեռնմխելիութեան հետ միաժամանակ յայտարարեց և՛ ազգերի անձեռնմխելիութիւնը: Դարերի պատմութիւնը ստեղծել էր ազգային ուրոյն անհատականութիւններ, իրանց քաղաքակրթական մասնայատուկ պայմաններով, լեզուով, բարքերով, աւանդութիւններով: հանձարի ինքնատիպ արտադրութիւններով և այդ իրողութիւնը չէր կարելի անտեսել այն ժամանակ, երբ յայտարարում էին քաղաքական հասարակութեան սկզբունքները, ժողովրդական միահեծանութիւնը, ռամկավարութիւնը, սահմանադրական և պարլամենտական ըէժիմը: Ազգն էլ, որպէս մարդկութեան մի անբաժան մասնիկը, պէտք է իր ինքնադրոշմ քաղաքակրթութիւնը, իր մասնաւոր

ազգակաները ներդաշնակօրէն զարգացնելու իրաւունքը ունենար: Դա մարդկային ազատութեան էական ու անհրաժեշտ պայմաններէն մէկն էր: Եւ Այսօր այդ գաղափարը տարածել է ամբողջ քաղաքակիրթ աշխարհում: Երէկւայ ճնշւած ու հալածւած ազգութիւնները այսօր իրանց ինքնուրոյն կեանքը ազատօրէն զարգացնելու պայմաններ են ձեռք բերում՝ կամ քաղաքական-պետական անկախութեամբ և կամ տեղական ինքնավարական հաստատութիւնների ստեղծումով: Յունաստանը, Սերբիան, Ռումանիան, Բօլգարիան, Մօնթէնէգրօն, Իտալիան, Գերմանիան, Հօլանդիան ձեռք բերին իրանց քաղաքական միութիւնը: Ուրիշներն էլ այսօր կամ հետևում են նրանց օրինակին և կամ առանց անկախ, անջատ կազմակերպութիւն ստեղծելու, աշխատում են ապահովել իրանց գոյութիւնն ու զարգացումը միևնոյն պետութեան մէջ, քաղաքական տարբեր օրգաններով:

Սօցիալիզմը հակառակ չէ ազգութիւնների այդ ուրոյն զարգացման գաղափարին: Նա ընդունում է ազգութիւնների անկախութիւնն ու ինքնավարութիւնը, որովհետև դա մի կենսական անհրաժեշտութիւն է նկատում մարդկութեան անսայթաք յառաջադիմութեանը, նրա ընդհանուր բարօրութեանն ու երջանկութեանը համար: Նա ոչ միայն ընդունում է, այլև կոխ է մղում, որ ամեն մի ազգ լիակատար իրաւունք ունենայ անարգել կերպով զարգացնելու ու մշակելու իր գիտակցական կեանքը, իր ինքնատիպ հանձարն ու ունակութիւնները, որոնցից օչտուչը ընդհանուր քաղաքակրթութիւնն է: Սօցիալիզմի տեսակէտով ապագայ համամարդկային ընտանիքի հոյակապ շէնքը պիտի կառուցուի:

ներկայ ազգային սիւների վրայ, Հիմնովին սխալ է, ուրեմն, եթէ ոչ ձրի զրպարտութիւն, այն կարծիքը թէ՛ սօցիալիզմը ձգտում է ջնջել ներկայ ազգութիւնները և աշխատում է ստեղծել համաշխարհաքաղաքացիական ընդհանուր, միապաղաղ ու միսձոյլ, մի ամբողջութիւն:

Միջազգայնութիւն չի նշանակում ազգային միութիւններ շի անհետացում, այլ ինքնավար ու ազատ ազգութիւնների մի դաշնակցութիւն: Սօցիալիզմը երաշխաւորում է բոլոր ազգութիւնների պատմա-անհատկան գոյութիւնը և աշխատում է նրանց միջից վերացնել փոխադարձ ատելութիւններն ու կոիւնները, ո՞ր արդիւնք են ներկայ կապիտալիստական կարգերի նաև ուէմ է մէկը միւսին տիրապետելու տենչանքներին, նւաճելու ազգայնական քաղաքականութեան, որտէ՛հետև մէկի իրաւունքների ոտնակոխումը համարում է մի ոճիր մարդկութեան ուէմ: Նա ցանկանում է բոլոր ազգերի և ժողովրդների մէջ հաստատել փոխադարձ սիրոյ և համերաշխութեան կապերը և այդպիսով կանգնեցնել ապագայ մարդկութեան յաղթական տաճարը, փառայեղ պանթէոնը, որ բոլորն էլ իրանց տեղը պիտի գրաւեն հաւաար իրաւունքներով և պարտականութիւններով:

Եթէ սօցիալիզմը ինքն իրան միջազգայնական է յայտարարում, պատճառն այն է, որ իր մղած կոիւր ազգային առհմաններից շատ աւելի ընդարձակ է Արդի տնտեսական բարեշրջումը ստեղծել է այնպիսի խոշոր ձեռնարկութիւններ, որոնք իրանց ցանցերը տարածել են, երկրագնդի ամենահեռուոր անկիւնները: Կապիտալիզմը չէ սահմանափափել ազգային շուկաների մէջ, նա տարածել է երգրագնդի ամեն

Generated on 2016-07-15 10:28 GMT / http://hdl.handle.net/2027/uc1.ax0001605955  
 Public Domain, Google-digitized / http://www.hathitrust.org/access\_use#pd-google

մասերում, և դրա համար է, որ կարլ Մարքսն ու Ֆրէդ-  
րիխ Էնգէլսը իրանց «Կոմունիստական Մանիֆէստ»-ի  
մէջ բոլոր երկիրներէ բան: որներէն հրաւեր էին Կար-  
դու միանալ և կոիւ մղել կապիտալիզմի դէմ, որը  
արդէն ինքն էր խորխակել ազգային սահմանները,  
Կատնէշները: Բայց սօցիալիզմի այդ միջազգային  
կոիւ ազգութիւնների վերացման չի ձգտում,  
այլ արդի կապիտալիստական իրաւակարգի ջնջման:

Պետութեան յասկանիշները. — Պետութիւնը ունի  
երկու յատկանիշ, — ներքին միահեծանութիւն,  
տյսինքն՝ ամբողջ երկիրը առանց օտար միջամտու-  
թեան, ինքնիշխան կառավարելու իրաւունքը, և  
արտաքին միահեծանութիւն, այսինքն՝ ամբողջ եր-  
կիրը արտաքին աշխարհի առջև ներկայացնելու և  
նրա անունով օտար պետութիւնների հետ յարա-  
բերութեան մէջ մտնելու, քաղաքական, տնտեսա-  
կան և այլ դաշինքներ կնքելու ազատ իրաւունքը:

Արդի քաղաքական լրաւութի (droit public)  
տեսակէտով այս երկու ստորոգիւիները մի ուէ պե-  
տութեան անկախ գոյութեան հիմունքներն են:  
Երբ մի պետութիւն զրկւած է այս անհրաժեշտ պայ-  
մաններից, նա անկախ մի պետութիւն չի համար-  
ւում այլևս: Այդ տեսակէտից թււրքիան մի ան-  
կախ պետութիւն չէ, որովհետև երկրի թէ՛ ներքին  
և թէ՛ արտաքին յարաբերութիւնների մէջ ազատ  
տնօրինութիւններ չի կարող անել: Նա քաղաքա-  
կանապէս և տնտեսապէս ենթարկւած է եւրոպա-  
կան պետութիւնների ազդեցութեանը: Սրանք ըս-  
տանձնել են թրքահպատակ քրիստոնեանների հովա-  
նաւորութիւնը, ունին թղթատարական վարչու-  
թիւններ երկրի ամեն մասերում, հաստատել  
են կապիտալիստիզմներ, այսինքն՝ եւրոպացիների



բացառիկ առանձնաշնորհումները, իրանց ձեռքումն են կենտրոնացրել ելժտական բոլոր աղբիւրները «Օսմանեան Հանրային Պարտքի Վարչութեան» միջոցով, ամբողջ ասիական նահանգները բաժանել են անտեսական ազդեցութեան շրջանակներէ և վերջապէս իրանց թևարկութեան տակ են առել Թիւրքիայի ամբողջ ցամաքային և նաւային զօրութիւնը: Արևելեան կնդրի ծագման օրից մինչև այսօր կատարւած այս իրողութիւնները Թիւրքիային զրկել են ներքին և արտաքին միահեծանութեան իրաւունքներից:

Պետութեան ձեւերը.— Պետութիւնը մի քանի ձևեր կարող է ունենալ, նայելով թէ՛ երկրի ներքին և արտաքին միահեծանութեան իրաւունքը ո՞ւմն է պատկանում: Այսպէս օրինակ, կան բացարձակ միապետութիւններ, սահմանադրական միապետութիւններ, հանրապետութիւններ և դաշնակցական պետութիւններ:

Բացարձակ միապետութիւնների մէջ միահեծանութեան, այսինքն՝ երկրի ներքին և արտաքին գործերը տնօրինելու իրաւունքը կենտրոնացած է մի եզակի անձի մէջ. սա է, որ երկիրը ինքնիշխան կերպով կառավարելու իրաւունքն ունի և իրանից դուրս ոչ ոք այդ իրաւունքը չունի: Միահեծանութեան անւանակիրը և ենթական ինքն է միայն և իր անձի մէջ ժարմնացնում է ամբողջ պետութիւնը: Լուդովիկոս 14-րդը, Ֆրանսիական թագաւորը, երբ ասում էր թէ՛ «Պետութիւնը ե՛ս եմ», երբէք չէր սխալոււմ, քանի որ ամբողջ Ֆրանսիայի թէ՛ ներքին և թէ՛ արտաքին կառավարութեան մէջ իր միահեծան կամքն ու քմահաճոյքն էր իշխում:

Հանրապետութիւնների մէջ միահեծանութեան անւանակիրն ու ենթական, փոխանակ մի եզակի

անձի, անձերի մի խումբ, հաւաքականութիւնն է: Հանրապետութիւնների և բացարձակ միապետութիւնների հիմնական, էական տարբերութիւնը հէնց դրանումն է կայանում:

Սահմանադրական միապետութիւնների մէջ միահեծանութեան իրաւունքը ամբողջապէս մի անձի չի պատկանում, այնտեղ կան և՛ ուրիշ ենթականեր, որոնք այդ իրաւունքի մէջ մասն ու բաժին ունեն:

Այդ ենթակաները մի կողմից թագաւորն է, իսկ միւս կողմից ժողովրդի մէկ կամ մի քանի ներկայացուցչական ժողովներն են: Սակայն, երկու տեսակ սահմանադրական-միապետութիւններ կան, որոնք միմեանցից խորապէս տարբերում են: Ոմանց մէջ ժողովուրդը միահեծանօրէն գործում է և ժառանգական միապետը կապում է, ընկերանում է ժողովրդին: Օրինակ, 1831-ի, Փետրվար 7-ի ռէճիքական սահմանադրութեամբ ժողովուրդն է աւելի միահեծան ճանաչւած և ժառանգական միապետը մասնակի իրաւունքներ ունի միայն: Երկրորդ կարգի սահմանադրական — միապետութիւնների մէջ, ընդհակառակը, միապետը, վեհապետն է, որ աւելի միահեծան իրաւունք ունի և իր այդ յատկութեամբ ներկայացուցչական ժողովներին յանձնում է մասնաւոր իրաւունքներ միայն: Այդպիսի սահմանադրական-միապետութիւն էր ներկայացնում, օրինակ, 1914-ին ֆրանսիական պետութիւնը: Նոյն բանը ներկայացնում են և այսօր ռուսական և օսմանեան պետութիւնները: Օսմանեան կայսրը, իբրև Սուլթան և Խալիֆա, միահեծան միապետ է և ներկայացուցչական ժողովները, որոնցից մէկը պարլամենտը (խորհրդարան) ընտրւում է ժողովրդի կողմից անուղղակի կերպով, իսկ միւսը՝

ծերակոյտը (աւագների ժողով) ընտրւում է կայսեր կողմից, երկուսն էլ միահեծանութեան չափազանց սեղմ, կրճատւած իրաւունքներ ունին :

Առաջին կարգի սահմանադրական-միապետութիւնները իրանց հիմնական սկզբունքներով մտնում են հանրապետութիւններին, իսկ երկրորդ կարգիները՝ հակառակ շնորհւած մի շարք ազատութիւններին՝ իբրև հիմք բացարձակ-միապետութեան սկզբունքն ունին :

Մինչև այժմ մեր թւած պետական ձևերի մէջ, —բացարձակ միապետական, սահմանադրական-միապետական և հանրապետական — միահեծանութիւնը պահում է իր կատարեալ միութիւնը : Չնայած որ նա ունի երբեմն մի քանի ենթակայաններ, այնուամենայնիւ. մէկ և անբաժան է, որովհետև երկրի թէ ներքին և թէ արտաքին կառավարութեան մէջ նա նոյն զօրութեամբ և ոյժով է արտայայտւում : Այդ իսկ պատճառով յիշեալ բոլոր պետութիւններն էլ կոչւում են միաւորական պետութիւններ :

Դաշնակցական պետութիւնների մէջ միահեծանութիւնը բաժանւած է : Դաշնակցական պետութիւնը կազմւած է մի շարք փոքր պետութիւններից, որոնցից իւրաքանչիւրը իր ներքին միահեծանութիւնն ունի, այսինքն՝ իր առանձին կառավարութիւնն ու յատուկ օրէնքները : Բայց այդ պետութիւններից կազմւած դաշնակցական պետութիւնը, իբրև ամբողջութիւն, իր կառավարութիւնն ունի և արտաքին միահեծանութեան իրաւունքը վերապահւած է միայն իրան : Նա է, որ ներկայացնում է ամբողջութիւնը արտաքին աշխարհի առաջ և նրա անունով էլ բանակցում է զանազան պետութիւնների հետ : Ընդհանուր հարցերը, ինչպէս օրինակ,

պատր, հեռագիր, մաքսը, բանակը, և այլն, մտնում են դաշնակցական պետութեան իրաւասութեան սահմանների մէջ:

Դաշնակցական պետութիւններ են այժմ Միացեալ Նահանգները, Զւիցերիան և Կերմանիան:

Պատմութիւնը ցոյց է տալիս, որ դաշնակցական պետութիւններ ստեղծելու համար նախապէս անհրաժեշտ է անկախ, անջատ պետութիւնների գոյութիւնը, որոնք քաղաքական, տնտեսական համանման շահեր ունենան: Ներկայումս էլ դաշնակցական պետութիւն կազմելու գաղափարը արմատ է գտնում այն երկիրներում, որոնք սահմանակից և փոքր լինելով՝ չեն կարողանում իրանց գոյութիւնն ու զարգացումը ապահովել մեծ, ուժեղ պետութիւնների դէմ: Բալկաններում, օրինակ, միշտ հարց է եղել դաշնակցութիւն ստեղծելու և եթէ մինչև այժմ այդ գաղափարը չէ իրագործել ազգայնական ուժեղ հակամարտութիւնների պատճառով, այնուամենայնիւ, ապագայում բալկանեան դաշնակցական պետութիւնը անխուսափելի անհրաժեշտութիւն պիտի գտնայ:

Աւելացնենք և՛ այն, որ դաշնակցական պետութիւն կազմելուց առաջ, Համադաշնակցութիւն է ստեղծւում: Համադաշնակցող պետութիւնները իրանց ներքին և արտաքին անկախութիւնը կատարելապէս պահում են և միայն ընդհանուր բնաւորութիւն ունեցող խնդիրների շուրջն են համաձայնում: Ժամանակի ընթացքում, այդ համադաշնակցական կապը աւելի և աւելի զօրանում է և տեղի է տալիս դաշնակցական պետութեան, ուր ինչպէս պարզեցինք վերելում, իւրաքանչիւր պետութիւն կորցնում է իր

արտաքին միահեծանութիւնը և պահուած է միայն ներքին միահեծանութիւնը :

Աչքի առաջ ունենալով մինչև այժմ կատարւած պետական էվօլիցիան, դաշնակցական պետութեան կազմութեան ազդակները և Թիւրքիայի քաղաքական, ցեղազրական պայմանները, վճռականօրէն կարելի է ասել, որ Թիւրքիան դաշնակցական մի պետութեան վերածելու գաղափարը հրնորական մի մտածուած է :

Ի՞նչ է կառավարութիւնը, կառավարութեան ձեւերը. — Պետութիւնը, ինչպէս ասացինք, բուրժուա-ազատամտական կարծիքով, իրաւական մի անձնաւորումն է մի երկրում ապրող ազգի կամ ազգերի : Իբրև այդպիսին, նա ուրեմն իրական շօշափելի մի մարմին չէ, այլ մի բարոյական անձնաւորութիւն : Անհրաժեշտ է, հետեւաբար, որ նա իր անունով գործող, ներքին և արտաքին միահեծանութիւնը գործադրող մի օրգան, մարմին ունենայ : Այդ օրգանը, մարմինը, ահա, կազմուած է կառավարութիւնը : Կառավարութիւնը այն օրգանն է, որ պետութեան անունով գործադրում է միահեծանութիւնը, այսինքն՝ հրատարակում է օրէնքներ, փոփոխում կամ ջնջում է նրանց, հսկում է հրատարակւած օրէնքների անշեղ կիրառութեան վրայ, խնամք է տանում երկրի ապահովութեան մասին և վարում է արտաքին, միջազգային յարաբերութիւնները : Սակայն նայելով թէ՛ այդ միահեծանութիւնը ո՞վ է գործադրում և ի՞նչպէս է գործադրւում, դրա համեմատ էլ կառավարութեան երեք տարբեր ձևեր կան :

Ուղղակի կառավարութիւն, ուր վեհապետը ինքն է, որ կամայական կերպով և լոկ իր կամքով գոր-

վերջնականապէս վաւերացնում ներկայացուցչական ժողովների քւէարկած վճիռները և նրանց օրէնքի ոյժ տալիս, նախարարներին կոչում և արձակում, ներկայացուցչական ժողովները լուծում, երբ որ կամենում է, պատերազմ է յայտարարում և խաղաղութիւն կնքում՝ առանց ժողովրդի ներկայացուցիչների հաւանութեան, և այլն : Այդ տեսակ կառավարութիւնը իսկապէս առերևոյթ միայն ներկայացուցչական է, որովհետև ժողովրդական ներկայացուցիչները հնազանդ, կամակատար գործիքներ են : Այդպիսի կառավարութիւն ունեն թուրքիան, Ռուսաստանը, և այլն :

Կասարեալ-ներկայացուցչական կառավարութիւն, ուր միանեծանութիւնը գործադրում են ժողովրդից ընտրած ներկայացուցչական ժողովը կամ ժողովները : Թէև այդպիսի կառավարութեան մէջ կարող է և վեհապետ լինել, բայց իրականապէս նա միանեծանական իրաւունքներ չունի : Երկրի թէ ներքին և թէ արտաքին գործերի ղեկը գտնւում է ժողովրդական ներկայացուցիչների ձեռքում և վեհապետը աւելի շուտ պատուոյ տիտղոս ունի : Սրէնքների հրատարակումը, նրանց փոփոխութիւնը կամ ջնջումը, երկրի ընդհանուր ելեմուտքի քննութիւնը, արտաքին յարաբերութիւնների պահպանումը, և այլն, ներկայացուցչական ժողովներից կախումն ունեն :

Առաջին ձևի կառավարութիւնը գոյութիւն ունի բացարձակ միապետութիւնների մէջ, երկրորդը՝ սահմանափակ սահմանադրական-միապետութիւնների մէջ, իսկ երրորդը՝ լայն սահմանադրական-միապետութիւնների և հանրապետութիւնների մէջ :

Պետութեան և կառավարութեան ու նրանց

ձևերի բացատրութիւններինց յետոյ, այժմ դիւրին է ըմբռնել, թէ ի՞նչ սահմանադրութիւնը:

Սահմանադրութիւն է կոչուում այն վաւերացրած օրէնքների ամբողջութիւնը, — որոնք սովորաբար մշակուում և հրատարակուում են այդ առթիւ մասնաւորապէս կազմուած ազգային ընդհանուր ժողովից, — որը պետական միահեծանութեան կամ ներքին ու արտաքին բոլոր հարցերի կարգադրութեան համար՝ գծում է մի կողմից վեհապետի իրաւունքների չափը և միւս կողմից՝ ներկայացուցչական ժողովների մասնակցութեան սահմանը:

Ուրեմն, սահմանադրութիւնը թէ վեհապետի և թէ ժողովրդից ընտրուած ներկայացուցչական ժողովների իրաւունքների սահմանն է որոշում: Բառացի նշանակութեամբ սահմանադրութիւն բառի իմաստը ինքնին պարզ է արդէն, — սահման դնել:

Սահմանադրութիւնը կոչուում է հիմնական օրհնի, որովհետեւ պարզ օրէնքների նման փոխախութեան չի ենթարկուում:

Ըստ Ֆէրդինանդ Լասսալի, (1) այս սահմանաւորումը Սահմանադրութեան արտաքին, իրաւական նշանակութիւնն է միայն պարզում և ոչ թէ սահմանադրութեան ոգին, էութիւնը: Նրա կարծիքով բաւական չէ միայն ասել թէ սահմանադրութիւնը ազգային ժողովի կողմից հաստատուած այն հիմնական օրհնին է, որ որոշում է մի ազգի քաղաքական կազմակերպութիւնը, որովհետեւ այդ սահմանաւորումը մեզ չի ասում թէ՛ ի՞նչպէս է ստեղծուում այդ հիմնական օրէնքը, ի՞նչ բանի արդիւնք է նա,

---

(1) Տես Ֆէրդինանդ Լասսալ՝ «Սահմանադրութեան էութեան մասին» բրոշիւրը:

ինչո՞ւ համար նա հիմնական է և պարզ օրէնքների նման փոփոխութեան չի ենթարկուում: Լասսալը դրա համար մի ուրիշ սահմանաւորումն է տալիս սահմանադրութեան: Նա ասում է, որ սահմանադրութիւնը մի երկրի մէջ գոյութիւն ունեցող հասարակական ոյժերի դրական, իրական յարաբերութիւնն է: Նայելով թէ տրւած մի երկրի մէջ ինչ հասարակական ոյժեր, դասակարգեր կան և թէ դրանք ի՞նչպիսի անտեսական, ընկերային փոխ-յարաբերութիւններ ունեն իրար նկատմամբ, ըստ այնմ էլ քաղաքական-վարչական մի կազմակերպութիւն, սահմանադրութիւն կը լինի, ուրիշ խօսքով՝ սահմանադրութիւնը ոչ այլ ինչ է, եթէ ո՛չ՝ ընկերային այդ դասակարգերի փոխ-յարաբերութեանց իրական արտայայտութիւնը: Եթէ, օրինակ, տրւած մի երկրի մէջ կայ մի թագաւոր, որ իրական իշխանութիւն ունի, որին հպատակում է ամբողջ ժողովուրդը, եթէ կայ մի ազնւականութիւն, որ իր ձեռքում կենտրոնացրել է բոլոր հողերը, և ի հարկին, կարող է բանակի ոյժով պաշտպանել իր սեփականութեան իրաւունքը, ապա այդ գէպքում թագաւորն ու ազնւականութիւնը երկրի սահմանադրութեան մէջ ուրիշ դիրք չեն կարող ունենալ, քան ինչ որ օւնեն արգէն իրականութեան մէջ: Բայց երբ իրական կեանքի մէջ, նրանք կորցնում են իրանց այդ առանձնաշնորհեալ դիրքը, ուրովհետև ոչ ոք չի ցանկանում հպատակել թագաւորին և պաշտպանել ազնւականութեան շահերը, այդ ժամանակ փոխւում է երկրի սահմանադրութիւնը: Եթէ թագաւորի փոխարէն ժողովուրդն ինքն է այս անգամ իրական իշխանութիւն ձեռք բերում և ազնւականութեան փոխարէն մի նոր դա-



սակարգ՝ բուրժուազիան է տիրանում երկրի հարստութեան ազգիւններին, այդ ժանանակ սահմանադրութիւնը ոչ այլ ինչ պիտի լինի, եթէ ոչ հասարակական այդ նոր տարրերի կեանքի մէջ ունեցած իրական ազդեցութեան արտայայտութիւնը: Սահմանադրութիւնը, ուրեմն, մի երկրի մէջ գոյութիւն ունեցող բնկերային ոյժերի իրական յարաբերութիւնն է և նրա փոփոխութիւնը կախած է այդ իրական յարաբերութիւնների փոփոխութիւնից:

Սահմանադրական շարժումը, ներկայ իմաստով ու բովանդակութեամբ, սկսել է 18-րդ դարի երկրորդ կէսից: Ամերիկայի և Ֆրանսիայի յեղափոխութիւնները յեղաշրջեցին նախկին բացարձակ բռնապետութիւնն ու ինքնակալութիւնը, որի մարմնացումն էր մի անձն, վեհապետը: Այդ յեղափոխութիւններով ժողովուրդը իրաւունք ստացաւ պետութեան գործերի ղեկավարութեան մէջ և վեհապետը կորցրեց իր բացարձակ արտօնութիւնները: Նրկու երկիրներում էլ սահմանադիր ազգային ընդհանուր ժողովներ գումարեցին, որոնք սահմանադրական հիմնական օրէնքներ մշակեցին: Ժողովրդի քւէարկութեամբ ընտրուած ներկայացուցչական ժողովները վեհապետի հետ միասին բաժանեցին միաշեմանութեան իրաւունքը: Սահմանադրական այդ շարժումը Ամերիկայից ու Ֆրանսիայից տարածեց եւրոպական միւս երկրներում, ուր նոյնանման սկզբունքներով քաղաքական հաստատութիւններ երևան եկան: Յետագայ տարիների ընթացքում աւելի լայն սկզբունքներով սահմանադրութիւններ ստեղծեցին: Ֆրանսիայում, 1814-ին, կազմեցին երկու ժողովներ՝ օրէնսդրական իրաւատու-

թիւններով, — պարլամենտ(խորհրդարան) և ծերակոյտ (աւագներ ժողով), պատասխանատու նախարարութիւն, հրատարակեցին մամուլի ազատութիւն, սահմանադրական երաշխաւորութիւններ, և այլն:

Բէլ՝իքայում, 1831-ին, աւելի լայն սահմանադրութիւն յայտարարեց: Այդպիսով, կարճ ժամանակում, եւրոպական շատ երկիրներում սահմանադրական ընթացք յաղթանակեց: Յունաստանն, անգամ 1844-ին ունեցաւ իր սահմանադրութիւնը: 1848-ին, Ֆրանսիայում կրկին յեղափոխութիւն ծագեց, որը լայն փոփոխութիւններ ներմուծեց նախկին սահմանադրութեան մէջ: Հաստատուեց հանրաքուէն, ըստ որում ամեն չափահաս քաղաքացի ներկայացուցչական ժողովի ընտրութիւնների համար քւէարգելու իրաւունք ստացաւ: Այդ պատմական թւականից յետոյ, գրեթէ ամբողջ Եւրոպայում սահմանադրական փոփոխութիւններ եղան և երկրի գործերի մէջ ժողովրդական ներկայացուցիչների մասնակցութեան սահմանը ընդարձակեցաւ:

Նախկին դրութիւնը, այսինքն՝ բացարձակ բռնապետութիւնն ու ինքնակալութիւնը իրանց գոյութիւնը պահեցին միմիայն Ռուսաստանի, Թիւրքիայի և Պարսկաստանի մէջ: Սակայն, այդ երկիրներում ևս սահմանադրութեան հաստատման փորձեր եղան: Թիւրքիայում, 1876 թւականին, հռչակեց Միդհատ փաշայի գծած սահմանադրութիւնը, որը թէև իսկապէս մի «պոչատ» սահմանադրութիւն էր, որովհետև սուլթանի բացարձակ իրաւունքները, մասամբ միայն ջնջում էր, այնուամենայնիւ, շատ կարճ կեանք ունեցաւ և հետեւել

տարին իսկ խափանեց Սուլթան Համիդի ձեռքով։  
Ռուսաստանում, 1905-ին, յեղափոխական անեղ  
շարժումը ստիպեց ցարին զիջումներ անելու և նա  
հոկտեմբեր 27ի մանիֆէստով նեղ, սահմանափակ  
մի սահմանադրութիւն յայտարարեց։ Այդ սահմա-  
նադրութիւնը, սակայն, ժողովրդի պահանջներին  
ոչ մի բաւարարութիւն չի կարող տալ, ուստի յե-  
ղափոխութիւնը այնտեղ վերջապէս չպէտք է նկատել։  
Մօտիկ ապագայում նա ուժգնօրէն պիտի պայթի  
կրկին և ընդարձակ, լայն սահմանադրութիւն ստեղ-  
ծէ, լիովին համապատասխան ժողովրդային ցան-  
կութիւններին։ Պարսկաստանում, նոնպէս, 1907 ին,  
յեղափոխութեան միջոցով սահմանադրութիւն հըս-  
չակեց։ Երգմնադուրժ Մէհմէդ Ալի շահը խափանեց  
այդ սահմանադրութիւնը և այդ օրից մինչև հիմա,  
երկիրը արիւնահեղ խռովութիւնների մի թատե-  
րավայր է։

ՅՁ տարի շարունակ, Աբդուլ-Համիդը միանե-  
ծանօրէն իշխելով և երկիրը իր քմահաճոյքով կա-  
ռավարելով՝ ընդհանուր աւերածութիւն ու քայ-  
քայում առաջ բերեց։ 1908, յուլիս 24-ին, ինչպէս  
յայտնի է, զինւորական մի հարւածով վերահաս-  
տատեց Միդհադեան սահմանադրութիւնը։

Միդհադի սահմանադրութեամբ, ինչպէս ասա-  
ցինք, սուլթանը պահում է, մեծ մասամբ, իր բա-  
ցարձակ իրաւունքները։ Գումարուոյ խորհրդարանը  
խորհրդակցական բնաւորութիւն ունի միայն և ծե-  
րակոյտն էլ ուղղակի սուլթանի կողմից է նշանակ-  
ւում։ Նախարարները պատասխանատու չեն խոր-  
հրդարանի առջև և սուլթանը իր կամայական հր-  
ահանագներով ազատօրէն կարող է լուծել ներկա-  
յացուցչական ժողովները, նախարարներին արձա-

կել ու արտաքին յարաբերութիւնների մէջ էլ միահեծանօրէն վճռել ամեն ինչ: Այնպէս որ Թիւրքիան այժմ կէս-ներկայացուցչական կառավարութիւն է կազմում, որի մասին կը խօսել ենք վերևում:

Նորագոյն սահմանադրական իրաւունքի սկզբունքները, սակայն, լիովին հակադրութեան մէջ են Միդհատեան սահմանադրութեան հետ: Այդ սկզբունքների հիման վրայ՝ եւրոպական շատ երկիրներ, Անգլիան, Ֆրանսիան, Իտալիան, Գերմանիան, Աւստրո-Հունգարիան, Զւիցերիան, Իսպանիան, Բելճիքան, Հօլանդիան, Լատին, կատարեալ ներկայացուցչական կառավարութիւն ունեն, ուր աւելի կամ նւազ չափով, ժողովուրդն է տնօրինում պետութեան գործերը:

Թիւրքիան իր պետական գոյութիւնն ու զարգացումը չի կարող ապահովել Միդհատեան սահմանադրութեամբ, որ զուրկ է ռամկավարական հիմունքներից և անտեսում է իր ծրցում ապրող ժողովրդների, ազգութիւնների անձեռնմխելի իրաւունքները: Նա իր գոյութիւնը կարող է ապահովել միայն ռամկավարական լայն սահմանադրութեամբ՝ հիմնւած բազկացուցիչ ժողովրդների իրաւահասարութեան սկզբունքի վրայ: Իսկ զրահամար անհրաժեշտ է կերարկել օրէնսդրայան ապակենտրոնացման՝ տեղական ինքնավարութիւնների ընդհանր:

Սահմանադրական շարժման այս համառօտ պատմականից յետոյ, անցե՞նք ցոյց տալու, թէ որո՞նք են այն հիմնական սկզբունքները, որոնց վրայ հիմնւում են նորագոյն սահմանադրութիւնները:

Նորագոյն սահմանադրութիւնների հիմնական

սկզբունքներն էն՝ ժողովրդական միահեծանութիւն, գաղտնի, ուղղակի. ընդհանուր և հաւասար ձայնատուութիւն, համեմատական ներկայացուցչութիւն, ժողովրդական վերհսկողութիւն, մէկ օրէնսդիր ժողով. իշխանութիւնների բաժանումն, — օրէնսդիր, գործադիր և դատաստանական իշխանութիւններ:

Այս սկզբունքների վրայ, առանձին առանձին, մինք կը ծանրանանք երկարօրէն, որովհետև սրանք կազմում են ուղղակի, ամբողջական հիմքը նորագոյն սահմանադրական իրաւունքի:

Ժողովրդական Միահեծանութիւն.— Միահեծանութիւնը, հասարակական իշխանութիւնը, և այն գործադրող կառավարութիւնը ամբողջութեան օգտի համար գոյութիւն ունեն: Ուրեշ խօսքով՝ քաղաքական կազմակերպութեան գոյութիւնը ընդհանուրի երջանկութեան ու բարօրութեան համար է միայն, այլապէս նա ու է միտք չէր ունենայ: Այդ ճշմարտութիւնից բղխում է այն հետեութիւնը, որ ընդհանրութիւնն էլ պիտի մասնակցութիւն ունենայ հասարակական իշխանութեան գործադրութեան մէջ: Եթէ պետութիւնը մի երկրի բովանդակ ժողովրդի քաղաքական ընկերակցութիւնն է, ապա ուրեմն նրա ներքին ու արտաքին միահեծանութեան մէջ ամբողջ ժողովուրդն էլ մասնութեան ու ողջմտութեան թելադրանքն է, որ կազմում է ժողովրդական միահեծանութեան հիմքը:

Հին ժամանակներում յունուկան և հռոմէական հասարակապետութիւնները գործնականացրել էին այդ սկզբունքը՝ իր բոլոր հետեութիւններով, գրեթէ բնազդաբար, իբրև անվիճելի մի ճշմարտու-

թիւն, որ բացատրու թեան անկարօտ է: Միջնադարեան հասարակապետութիւնները նոյնպէս ընդունել էին այդ սկզբունքը: Նորագոյն ժամանակներում ֆրանսիական յեղափոխութիւնը հանդիսաւորապէս հըռչսկից այդ սկզբունքը, ժամանակի կարիքներից բղխած հետևութիւններով, և այն ժամանակից մինչև այժմ, քաղաքակիրթ ամբողջ աշխարհում, ուր նորագոյն հիմունքներով սահմանադրութիւն գոյութիւն ունի. ընկերութեան բոլոր անդամների ձանակցութիւնը քաղաքական գործերի մէջ ընդունել է իրր անմիջական, կական անհրաժեշտութիւն:

Երկար դարերի ընթացքում, սակայն, բացարձակ միապետներին յաջողել է ալլամբոթօրէն իրենց ձեռքում կենտրոնացնել քաղաքական միահեծանութեան իրաւունքը և ժողովրդին պահել կատարեալ ստրկութեան մէջ: Այդ իրողութեան նպաստել են ժամանակի տգիտութեան եւ խաւարամտութեան ոգին, կրօնական միամիտ հաւատալիքները, դարևոր աւանդութիւններն ու բարքերը. շահագործելով ժողովրդի այդ անսահման կրաւորականութիւնը, նրա դիրահաւատութիւնը, միապետները իրանց պաշտպան փաստաբանների միջոցով յայտարարել են, որ իրանք իրանց միահեծանութեան իրաւունքը սկզբից իվեր ժառանգել են ամենակարող Աստուծոց և ոչ թէ ժողովրդից: Այդ կերպով նրանք բռնացել են ժողովրդական կամքի վրայ, գործ դրել ամեն տեսակ կեղեքումներ ու ճնշումներ և ժողովրդին երկաթէ հարւածներով ստիպել, որ իրանց բացարձակ հնազանդութիւն ցոյց տան: Երկար ժամանակ միահեծան վեհապետները կարողացան այդպէս պահել իրանց տիրապետութիւնը,

մինչև որ ժողովուրդը կոյր շահերը բանալով՝ հասկացաւ թէ այդ բոլորը իր անդիտակցութեան հետեւանքն է, թէ միապետը շահագործելով իր այդ տգիտութիւնը, հաստատել էր իր գերագոյն իշխանութիւնը և նւիրագործել այն աստուածային իրաւունքով: Մրանսիական մեծ յեղափոխութիւնը ջախջախելով միապետի այդ անսահման իշխանութիւնը, բարձրաձայն յայտարարեց մարդու և քաղաքացու իրաւունքները և միապետական միահեծանութեան հակադրեց ժողովրդական միահեծանութիւնը:

Ժողովրդական միահեծանութիւնից բղխում են մի շարք հետեւութիւններ, որոնց մասին կը խօսենք ստորև: Նախ ասինք, որ հասարակական իշխանութիւնը, միահեծանութիւնը ներկայումս գործադրւում է երկու ձևով, կամ ուղղակի և կամ անուղղակի կերպով: Ուղղակի է կոչւում այն ժամանակ, երբ ժողովրդի բոլոր անդամներն էլ հաւասարապէս զրական մասնակցութիւն են ունենում քաղաքական ղեկավարութիւն մէջ: Անուղղակի կոչւում է այն դէպքում, երբ բոլոր քաղաքացիները քւէարկութեամբ օրէնսդրական ժողովի անդամներ են ընտրում, որոնց յանձնում են հասարակական իշխանութեան ղեկը: Առաջին պարագային, ուղղակի կառավարութեան հանդէպ ենք գտնուում, իսկ երկրորդ պարագային՝ ներկայացուցչական կառավարութեան դիմաց: Ուղղակի կառավարութիւնը, ինչպէս ասել ենք, գոյութիւն ունի Չւիցերական 4 կանտոններում, որոնք են՝ Ուրի, Գլարուս, Ապպինցել և Ունտէրվուդէն: Այդ 4 կանտոնները իրանց բնակիչների թւով և աշխարհագրական տարածութեամբ շատ փոքր են և դրա համար է, որ բոլոր քաղաքացիներն էլ անխտիր ուղղակի կեր-

պով մասնակցում են երկրի գործերում: Մինչդեռ մեծ ազգարնակութիւն և ընդարձակ տարածութիւն ունեցող պետութիւններում, ներկայացուցչական կառավարութեան սիստէմը միայն կարող է կիրառութիւն ունենալ, որովհետև գործնական անկարելիութիւն կայ ընկերութեան բոլոր անդամների համար մի տեղ հաւաքւելու և կազմելու ազգային ժողովը:

Ներկայացուցչական կառավարութիւնների մէջ, ուրեմն, ժողովրդի մասնակցութիւնը պետական գործերում ընտրողական իրաւունքով է որոշւում:

Ընտրողական իրաւունքը, նայելով կառավարութիւնների ձևին, զանազան ժամանակներում ու զանազան երկիրներում եղել է սահմանափակ կամ լայն: Սահմանափակ է եղել այն տեսակէտով, որ բոլոր քաղաքացիներն էլ անխտիր քւէի իրաւունք չեն ունեցել: Այդ իրաւունքը միայն տրւել է առանձնաշնորհեալ գիրք ունեցողներին, նրանց, որոնք հարստութիւն են ունեցել և յայտնի տուրք են վճարել կառավարութեան: Ք.էի իրաւունքի այդ սահմանափակումը ժողովրդական միահեծանութեան սկզբունքի ժխտումն է: Մինչդեռ որպէսզի ժողովրդական միահեծանութիւնը իր ամբողջ զօրութեամբ արտայայտւի, հարկաւոր է, որ առանց դատակարգի խտրութեան, ընկերային դիրքի տարբերութեան, բոլորն էլ հաւասարապէս քւէի իրաւունք ունենան: Այդ կերպով է, որ ժողովրդի հաւաքական կամքը յարգւած կը լինի: Բացի ընտրելու իրաւունքից, պէտք է ընտրւելու իրաւունք ունենան բոլորը: Սա ժողովրդական միահեծանութեան սկզբունքի առաջին ու ամենաէական հետևութիւնն է: Ընտրողական վերոյիշեալ ձևը կոչ-



ւում է հանրաքւէ:

Հանրաքւէն հաստատուել է 1848-ի Ֆրանսիական յեափոխութիւնից յետոյ, բայց նրա զարգացումը կատարուել է գլխաւորապէս անցեալ դարի վերջին քառորդից: Նա գործադրւեցաւ Հիւսիսային Ամերիկայի մի քանի պետութիւնների մէջ, Զիցերահան դաշնակցական և կանտոնային ընտրութիւնների համար: Իսպանիայում հանրաքւէն հաստատուեց 1869 թւին և ջնջւեց 1877-ին, բայց 1890 թւին կրկին վերահաստատուեց, Գերմանիայում 1871-ի սահմանադրութեան համաձայն՝ նա կիրառւում է Ռէյխստագի ընտրութիւնների համար: Ֆրանսիայում, հակառակ 1848-ի յեղափոխութեան, նա գործադրւեցաւ 1871-ից սկսած: Բելճիքայում նա գոյութիւն ունի 1893-ից, իսկ Աւստրո-Հունգարիայում 1906-ից սկսած:

Հանրաքւէի առաւելութիւններն ու օգուտները բազմակողմանի են: Իւրաքանչիւր անհատ իրր քաղաքացի, քաղաքական գործերում իր քւէով մասնակցելով՝ քաղաքական դաստիարակութիւն կստանայ: Բացի այդ կարևոր հանգամանքից, նա իր շահերի գիտակցութիւնը կունենայ և թոյլ չի տայ երբէք, որ մի առանձնաշնորհեալ փոքրամասնութիւն իր վճիռներին օրէնքի ոյժ տալով՝ քաղաքական գերիշխանութիւն ձեռք բերէ՝ ի վնաս իրան:

Հանրաքւէի յատկանիշները չորս են. — Ընդհանուր, հաւասար, ուղղակի և պաղտնի: Ընդհանուր ու հաւասար է հանրաքւէն այն ժամանակ, երբ 21 տարեկան բոլոր չափահասները ընտրական համահաւասար իրաւունքներ ունեն՝ առանց սեռի և դասակարգի խտրութեան, ընտրւող լինելով միասին:

Վերոյիշեալ երկիրներում թէև հանրաքւէն գոյութիւն ունի, բայց նա բացառապէս այր մարդկանց համար է, մինչդեռ կանայք զրկւած են ընտրական իրաւունքից: Բացի դրանից, մի քանի երկրներում հանրաքւէն որոշ սահմանափակումներ ունի և բոլոր քաղաքացիներն էլ հաւասարապէս ընտրական մի ձայն չունեն: Այդ սահմանափակումները հետեւեալներն են, —յաւելւածական քւէ (vote plural) և բազմապատիկ քւէ (vote multiple):

Յաւելւածական քւէն կայանում է նրանում, որ ընտրողների մի խմբի, մի դասակարգութեան տրւում է մի քանի ձայն փոխանակ մէկի, համաձայն նշանց հարստութեան, ստացած կրթութեան, և այլն: Այսպէս, օրինակ, ընտրական այդ օրէնքը 1839-ից ընդունւած է Բելճիքայում, ըստ որում ամեն մի 25 տարեկան քաղաքացի ունի մի ձայն, յաւելւածական ձայն շնորհւում է այն անհատին, առաջին՝ որը հարուստ կալւածատէր է, մեծ ճարտարագործ կամ վաճառական է. երկրորդ՝ 35 տարեկան մի մարդու, որ օրինական սերումն ունի և կամ որոշ հարկ է վճարում. 2 յաւելւածական ձայն էլ տրւում է ամեն մէկին, որ կրթական վկայականներ ունի և կամ հասարակական պաշտօնեայ է:

Բազմապատիկ քւէն այն սխտէմն է, որ մի ընտրողի թոյլ է տալիս մի քանի քաղաքամասերում կամ համայնքներում ընտրական ձայն ունենալու և քւէարկելու: Այսպէս օրինակ, Ֆրանսիայում մի ժամանակ գործադրւող օրէնքի համաձայն՝ ամեն մի ընտրող կարող էր քւէ տալ թէ իր համայնքում կամ քաղաքամասում, ուր սեփական բնակարան ունէր, և թէ այն քաղաքամասում և համայնքում, ուր նա 6 ամսով տուն էր վարձել: Այդ ձևով մի

ընտրող կարող էր միաժամանակ ձայն տալ այն բո-  
լոր ընտրական շրջաններում, ուր նա լրացրել էր  
վերոյիշեալ պայմանները: Հասկանալի է, որ բազ-  
մապատիկ քւէն գերակշիռ դիրք կարող է տալ նը-  
րանց, որոնք կալւածական սեփականութիւն ունեն:  
Ընտրողական այդ սիստէմը այժմ գոյութիւն  
ունի Անգլիայում:

Յաւելւածական և բազմապատիկ քւէի կիրա-  
ռութեամբ, անկանկած, հասարակութեան արտօն-  
եալ դասակարգին հնարաւորութիւն է տրոււմ  
երկրի քաղաքական իշխանութեան մէջ առաւելա-  
կշիռ ձայն ունենալու: Աղքատ, չքաւոր դասա-  
կարգը անկարող լինելով վերոյիշեալ պայմանները  
լրացնելու, խորհրդարանի մէջ՝ յանձին իր ներ-  
կայացող ցիւների՝ վճռական ձայն ունենալուց զրը-  
կըւում է և քւէարկած օրէնքները հարուստների  
դասակարգային շահերին ինչպէս են լինում: Մինչ-  
դեռ ժողովրդական միահեծանութեան սկզբունքի  
տեսակէտով, հանրաքւէն լինելու է անպայման  
ընդհանուր և հաւասար, առանց սեռի և հարստու-  
թեան խտրութեան և և իւրաքանչիւր 21 տարեկան  
չափահաս քաղաքացի ընտրական հաւասար ձայն  
պիտի ունենայ՝ ընտրւելու իրաւունքով:

Հանրաքւէն ուղղակի է կոչւում այն ժամա-  
նակ, երբ բոլոր չափահաս քաղաքացիները անմի-  
ջական կերպով կընտրեն օրէնսդրական ժողովի՝  
խորհրդարանի անդամները: Ընտրական այդ եղա-  
նակի դէմ էլ ստեղծւել են արգելքներ մի քանի  
երկիրներում, ուր դրա փոխարէն ընդունւել է ընտ-  
րական անուղղակի կամ երկաստիճան ձևը:

Անուղղակի կամ երկաստիճան ընտրական ե-  
ղանակով ընտրողները իրաւունք չունեն անմիջա-

ջական կերպով ընտրելու պարլամենտի, խորհրդա-  
րանի, անդամները: Նրանք իրաւունք ունեն միայն  
պատւիրականք ընտրելու, որոնք իրանց միջից ընտ-  
րում են խորհրդարանի պատգամաւորներին: Ա-  
նուղղակի ընտրական այդ ձևը դրա համար էլ կոչ-  
ւում է երկաստիճան: Յայտնի է, որ այդ եղանա-  
կով ընտրւած պատգամաւորը յաճախ ու գրեթէ  
միշտ ժողովրդի շահերին հակառակ է լինում և  
պաշտպանում է հարուստ փոքրամասնութեան շա-  
հերը: Բացի այդ հանգամանքից, այդ ձևի ընտրու-  
թեան ժամանակ լինում են շատ խարդաւանանք-  
ներ ու յարմարումներ:

Անուղղակի հանրաքւէն այժմ գոյութիւն ունի  
Սերոպայում գլխաւորապէս ծերակուտական ընտ-  
րութիւնների համար: Երբեմն այդպիսի հանրաքւ-  
էն հասնում է մինչև 3-4 աստիճանի: Սերոպայից  
դուրս, Ամերիկայի Միացեալ նահանգներում ընտ-  
րական նոյն դրութիւնը գոյութիւն ունի նախա-  
գահական ընտրութիւնների համար: Ուրիշ երկիր-  
ներում, Գերմանիայում՝ լանգագների և Թիւր-  
քիայում խորհրդարանի համար ընդունւած է այդ  
երկաստիճան եղանակը: Թիւրքիայում ընտրական  
այդ սխառէմի հետևանքով տիրող կուսակցութիւնը,  
որ այժմ համախառնական և համաթրքական ծրագիր  
ունեցող «Իթթիհաս վէ Թէրագզն» է, պատւիրակ-  
ների վրայ խիստ ճնշումներ է գործ դնում և այդ-  
պիսով յաջողեցնում է թեկնածուները: Աւելորդ է  
ասել, որ այդ դէպքում ընտրւած երեսփոխանները  
ժողովրդական ուզատ քւէի ներկայացուցիչները չեն:

Հանրաքւէն գաղտնի է անւանւում այն դէպ-  
քում, երբ քւէարկութիւնը լինում է ծածուկ, ոչ  
բաց: Շատ երկիրներում հարուստները առաջար-

կում են, որ ընտրութիւնը լինի բացարձակ կերպով, ոչ գաղտնի: Սակայն, այդպիսի ընտրութեան ժամանակ, կարող են կողմնակի ճնշումներ ու ազդեցութիւններ գործ դրել, որոնք քաջարկողին կարող են ստիպել իր ցանկացած անձնաւորութեան չտալ իր քէն: Զանազան շահերով մէկը միւսին կապւած լինելով, ընտրութեան ժամանակ, պարտաւորուած է իր քէն տալ իր շահերին հակառակ անհատի՝ ճնշումներից խուսափելու համար: Իսկ այդ պարագան շատ անցանկալի դէպքերի ու անպատեհութեանց ծնունդ է տալիս:

Ուրեմն, հանրաքէն ընդհանուր, հաւասար, ուղղակի և գաղտնի պէտք է լինի: Ժողովրդական միահեծանութիւնը ազատօրէն արտայայտուած է միայն ձայնատուութեան այդ ընդհանուր եղանակով: Ընտրական այդ սիստեմը կոչուած է քառանդամ ֆորմուլա-բանաձև: Բոլոր երկիրների յառաջագէժ տարրերը, ժողովրդական կուսակցութիւնները պաշտպանուած են այդ բանաձևը և այնտեղ, ուր նա գոյութիւն չունի, աշխատուած են իրականացնել: Ներկայումս այդպիսի հանրաքէն գոյութիւն ունի Ֆրանսիայում, Զելիցերիայում, Միացեալ Նահանգներում, Էսպանիայում, Այդ երկիրներում, սակայն, կանայք զուրկ են ընտրական իրաւունքից, այնպէս որ ընտրութիւնները սեռական խտրականութեան վրայ են կատարուած: Կանանց քաջարկութեան իրաւունքը յարգուած է միայն Հիւսիսային Ամերիկայի մի քանի նահանգներում, Նոր Զելանդիայում, Աւստրալիայում և Ֆինլանդիայում:

Հակառակ ժողովրդական միահեծանութեան գաղափարից բղխող ընտրական այդ քառանդամ բանաձևին, կայ և մի ուրիշ ընտրական սիստէմ,

որ սահմանափակ է և հիմնւած է ցենզային ներկայացուցչութեան վրայ: Ըստ այդ սիստէմի, քաղաքացիների մի ամբողջ ստւար խումբ, բոլորովին զըրկւում է ընտրական իրաւունքից: Ընտրական ձայն ունեն միայն նրանք, որոնք սեփականատէր են և որոշեալ հարկ են վճարում, որը կազմում է ցենզ (cens): Ռուսաստանում Դումայի, ինչպէս և նահանգային խորհուրդների (զեմստվո) և քաղաքային վարչութիւնների ընտրութիւնները ցենզային են: Անգլիայում նմանապէս այդ զըրութիւնը գոյութիւն ունի. թէև շատ մեղմ արտայայտութեամբ, որ մօտենում է հանրաքւէի դըրութեան: Այսպէս, օրինակ, 1884-ի օրէնքով ամեն ոք կարող է ընտրող լինել, որ նւազագոյն չափով տարեկան 10 լիվր (250 ֆրանք) տան վարձ է վճարում:

Քիչ վերը մենք բացատրեցինք, որ ժողովրդական կամքը միայն ընդհանուր, հաւասար, ուղղակի, գաղտնի ձայնատւութեան եղանակով կարող է արտայայտել: Սակայն, որպէսզի նա աւելի ճշտօրէն ու հաւաքականօրէն արտայայտելի, պէտք է գործարբել ընտրական և մի այլ սիստէմ, որը կոչւում է հաւեւնասական ներկայացուցչութիւն:

Համեմատական ներկայացուցչութեան սկըբունքը շատ պարզ է: Ենթադրենք թէ մի քաղաքի քաղաքապետական ընտրութիւն է կատարւում: Ըստ օրինի 50 քաղաքապետական աթոռներ կան, 50 հազար էլ ընտրողներ, որոնց ձայները ընտրական ցուցակով բաժանւում են այսպէս.—

|                          |          |
|--------------------------|----------|
| Իթիւաֆական կօմիտէ        | 20 հազար |
| Սօց. Դէմ. Հնչակեան Կուս. | 15 »     |
| Եւ Յունական կօմիտէ       | 15 »     |

Ընդամենը 50 հազար ձայն:

Ուրեմն 50 աթոռների համար 50 հազար ընտրողներ կան : Ենթադրենք, թէ իւրաքանչիւր 1000 ընտրող կարող է ունենալ մի աթոռ, այդ դէպքում ամեն մի կօմիտէ կունենայ այնքան աթոռ, որքան անգամ նա 1000 ընտրող ունի : Որպէսզի ընտրական մարմնի ամենակատարեալ ներկայացուցչութիւնը ապահովւի, դրա համար Իթիլաֆական կօմիտէն պիտի ունենայ 20 աթոռ, Հնչակեան կօմիտէն 15 և Յունական կօմիտէն նոյնպէս 15 :

Ինչ որ քաղաքապետական ընտրութիւնների համար է, նոյնը կարելի ասել և պարլամենտական, խորհրդարանական ընտրութիւնների համար : Ենթադրենք, թէ մի որ և է շրջանում կան լինց հարիւր հազար ընտրողներ : Սրանցից երեք հարիւր հազարը պատկանում են մի կօմիտէի, երկու հարիւր հազարը մի ուրիշ կօմիտէի և հարիւր հազարն էլ մի այլ կօմիտէի : Եթէ ընդունենք, որ իւրաքանչիւր 50 հազարը պիտի ընտրէ մի պատգամաւոր, այդ ժամանակ նոյն շրջանը պարլամենտի համար կարող է ուղարկել 12 պատգամաւոր : Որպէսզի նոյն շրջանի ձայները պարլամենտում ճշտօրէն արտայայտուին, հարկաւոր է, որ համեմատական հաշուով առաջին կուսակցութիւնը ունենայ 6 ներկայացուցիչ, երկրորդը՝ 4 և երրորդը՝ 2 : Այդ դասաւորութեամբ պարլամենտում կարելի է լիակատար ու արդարացի կերպով արտայայտել երկրի ամբողջութեան կամքն ու ցանկութիւնները՝ թէ մեծամասնութեան և թէ փոքրամասնութեան :

Սակայն, ներկայումս ընտրական ներկայացուցչութիւնը հիմնւած է մեծամասնական սկզբունքի վրայ : Ենորհիւ այդ հանգամանքի, փոքրամասնութեան ձայնը խեղդւում է և պարլամենտի ներ-

կայացուցիչները, մեծ մասամբ, ընտրուում են այն կուսակցութիւնից, որը որ շատ ընտրողներ ունի։ Միւս կուսակցութիւնները զրկուում են իրանց ներկայացուցիչներից և եղած ընտրութիւնները լինում են բոլորովին անհամապատասխան երկրի ընդհանուր տրամադրութեան։

Մեծամասնական սիստէմը, ուրեմն, թէ թւական և թէ քաղաքական տեսակէտով ունի լուրջ անյարմարութիւններ։

Նախ, ընտրակոն շրջանները թւական հաւասար մասեր չունեն շատ անգամ։ 50 հազար ձայն ունեցող շրջանը նոյն իրաւունքներն ունի, ինչ որ 25 հազար ունեցողը։ Երկրորդ թերութիւնը ընտրութիւնների արդիւնքի և ընտրական մարմնի մէջ գտնուած կուսակցութիւնների ոյժի անհամեմատութիւնն է։ Եթէ, օրինակ, մի կուսակցութիւն ամբողջ երկրի քւէարկող զանգւածի վրայ ընտրողների մէկ ութերորդ թիւն ունի, այն ժամանակ իր ներկայացուցիչներն էլ ընդհանուր ներկայացուցչութեան մէկ ութերորդ մասը պիտի կազմեն։ Սակայն, դժբաղդաբար, այդպէս չի լինում. իւրաքանչիւր կուսակցութիւն փոխանակ իր անդամների թիւն հապապատասխան ներկայացուցիչներ ունենալու, համեմատական քանակից աւելի կամ պակաս ներկայացուցիչներ է ունենում, ինչ որ բոլորովին յանիրաւի մի հանգամանք է։

Երրորդ թերութիւնը կայանում է նրանում, որ ընտրուած պատգամաւորները մեծամասնութիւն չեն ներկայացնում, այսինքն՝ պատգամաւոր ընտրող ձայների ամբողջութիւնը յաճախ նւազ է լինում պարտուած և ձեռնպահ մնացած ձայների թիւից։ Բացի այս թւական թերութիւններից, քաղա-



քական անյարմարութիւնները նոյնպէս շատ աչքի զարնող են: Ամեն տեսակ բաղկացութիւններ, խարդաւանանքներ ու մեքենայութիւններ կարելի են դառնում, որպէսզի մի քանի ձայների առաւելութեամբ մէկի կամ միւսի ընտրութիւնը ապահովւի:

Ինչ ասել կուզի, որ համեմատական ներկայացուցչութեան սիստէմով այդպիսի թերութիւններ ու անախորժ դէպքեր տեղի չեն ունենալ: Նա առիթ է տալիս ընտրողներին, ինչպէս վերևում շեշտեցինք, իրանց ներկայացուցիչները ունենալու ներկայացուցչական ժողովում: Բացի դրանից, նա այդպիսով կը կանոնաւորէր քաղաքական կեանքը, որովհետև կուսակցութիւնների գործունէութիւնը կը դարձնէր աւելի պարզ, իւրաքանչիւրին տալով ազատ ասպարէզ՝ իր ձգտումներն ու նպատակները հետապնդելու:

Բնականաբար, որպէսզի վերոյիշեալ դրութիւնը անարգել կերպով գործադրւի, հարկաւոր է, որ քաղաքական խոշոր խմբակցութիւններ լինեն, իրանց յետևը ունենալով հասարակական յայտնի զանգւածներ: Հակառակ դէպքում, եղած ընտրութիւնները չեն կարող մի որոշ ներկայացուցչութիւն ստեղծել և քաղաքական կեանքը պարզել:

Թիւրքիայում կուսակցութիւնների այս համեմատական ներկայացուցչութեան պահանջը չէ, որ առհասարակ դրւում է, այլ ազգային համեմատական ներկայացուցչութեան բանաձևը: Ճիշտ է, որ Թիւրքիան զանազան ցեղերի ու ազգերի մի մօզայիկ է, բայց ըստ մեզ, ազգային համեմատական ներկայացուցչութիւնը ունակավարական մի պահանջ չէ: Այդ սիստէմի կիրարկութեամբ, հայ ընտրողը միայն հայ թեկնածուին պէտք է քւէ

տայ և միւս ազգութիւններն էլ իրանց ազգային թեկնածուներին: Այդ դէպքում, եթէ ներկայացող հայ թեկնածուն պահպանողական է և նրա հակառակորդը մի յառաջադիմական յոյն է, հայ ընտրողները քէն պէտք է կենտրոնանայ պահպանողականի վրայ, որովհետև նա հայ է և ոչ յառաջադիմականի վրայ, որ մի յոյն է: Մինչդեռ ժողովրդային շահերի և նոյն իսկ հայ ընտրողների շահի տեսակէտից, յառաջադիմական յոյնի ընտրութիւնը աւելի օգտակար կարող է լինել:

Ժողովրդական վերհսկողութիւն. — Որպէսզի ժողովրդական միահեծանութեան սկզբունքը իր քովանդակ զօրութեամբ արտայայտւի, բաւական չէ միայն ուղղակի, հաւասար, ընդհանուր և գաղտնի հանրաքէն և համեմատական ներկայացուցչութեան սխտէմը, հարկաւոր է նոյնպէս, որ ժողովուրդը կարողանայ հասարակական գործերի վրայ հսկել: Այդ խնդիրը քննելով՝ զանազան լուծումներ են տրւել նրան. որոնք են, հրամայական մանդատ (mandat impératif), ընթերէնդում (referendum) և նախաձեռնութեան իրաւունք:

Հրամայական մանդատը ժողովրդական ներկայացուցչութեան սխտէմը դարձնում է աւելի կատարեալ: Իւրաքանչիւր պատգամաւոր ներկայացընում է իրան ընտրող ժողովրդի բերանը: Հետեւաբար, մինչև վերջ պիտի պաշտպանէ այն պահանջներն ու հայեացքները, մի խօսքով՝ այն քաղաքական ծրագիրը, որ բանաձևել է իրան ընտրողների խումբը: Երբ նա դադարի այդ հայեացքներն ու պահանջները պաշտպանելուց, նա գրկւում է իր պատգամաւորի տիտղոսից ու իրաւունքից: Այդպիսով, ուրեմն, պատգամաւորը գառնում է ժո-

ղովրդական կամքի գործիրը : Այն ծրագիրը, որը ընտրող մի հասարակութեան քաղաքական դաւանանքն է կազմում, ներկայացնում է մի դաշնագիր նոյն հասարակութեան և իր պատգամաւորի համար : Երբ այս վերջինը շեղուում է այդ դաշնագրից, այնուհետև նա կորցնում է իր ընտրող ժողովրդի ձայնը ներկայացնելու իրաւունքը : Հրամայական մանդատը ուրեմն մի զէնք է, որով ժողովուրդը իր ներկայացուցիչների գործողութեանց վրայ անուղղակի կերպով հսկում է : Բայց ուպէսզի հրամայական մանդատը գործադրւի, անհրաժեշտ է որ կազմակերպւած քաղաքական խմբակցութիւններ լինեն : Եթէ ընտրողները կազմակերպւած չեն, այդ դէպքում նրանք չեն կարող մէկ և ամբողջական մի ծրագիր ներկայացնել և ստիպել, պարտադրել պատգամաւորին, որ հաւատարիմ մնայ ներկայացւած ծրագրին : Որչափ մի երկրում քաղաքական կազմակերպութիւնները լաւ կազմակերպւած են, այնչափ էլ հրամայական մանդատի դրութիւնը խստորէն յարդուում է և պատգամաւորը պարտաւորւում է նոյն չափով հաշտուութիւն տալ՝ իր խորհրդարանական գործունէութեան մասին :

Րեփրէնտուլը.— Րէֆրէնդումը այն սխալման է, ըստ որում օրէնսդրական ժողովը իր ընդունած վճռորոշումները պիտի ենթարկէ ժողովրդական քննութեան և հաւանութեան :

Սակայն, Րէֆրէնդումի մի քանի տեսակները կան : Առաջին, կարելի է, օրինակ ժողովրդական կամքը հարցնել գոյութիւն ունեցող սահմանադրութեան վերաքննութեան մասին : Այդ դէպքում Րէֆրէնդումը կոչուում է խորհրդակցական :

Երկրորդ, ժողովրդի խորհուրդը կարելի է հար-

ցընել օրէնսդրական իշխանութեան կողմից քւէարկելի մի ուէ օրէնքի մասին: Այդպիսի րէֆէրէնդումը կոչուում է օրէնսդրական:

Օրէնսդրական րէֆէրէնդումը երեք տարբեր ձևեր ունի: Նա կարող է լինել պարտադիր, կամաւոր և կամ դառնալ ժողովրդական վէտօի իրաւունք:

Պարտադիր րէֆէրէնդումի համաձայն, օրէնսդրական ժողովի կողմից քւէարկւած բոլոր օրէնքները պէտք է ներկայացնել ժողովրդական վաւերացման: Այդօրինակ րէֆէրէնդումը գոյութիւն ունի այժմ Զւիցերիական մի քանի կանտօններում, ինչպէս Բալ, Բերն, Յիւրիխ, և այլն: Պետական ծախսերը նոյնպէս ներկայացուում են ժողովրդական հաւանութեան:

Ըստ կամաւոր րէֆէրէնդումի, ժողովրդին իրաւունք է տրուում, մի որոշեալ ժամանակամիջոցի համար, օրէնսդրական ժողովի քւէարկած որ և է օրէնքը ընդունելու և կամ փոփոխութեան ենթարկելու: Եթէ այդ առաջարկը որոշեալ պայմանաժամում տեղի չունեցաւ, օրէնքը կարող է կիրառութեան մէջ մտնել:

Եթէ րէֆէրէնդումի սխառէմը ընդունում է ժողովրդական վէտօի իրաւունք, այդ ժամանակ օրէնսդիր ժողովի քւէարկած ամեն մի օրէնքը պարտադիր է, այսինքն՝ անմիջապէս գործադրուում է: Բայց մի որոշեալ ժամանակամիջոցում ժողովուրդը կարող է իր վէտօով ջնջել նրա գործադրութիւնը:

Րէֆէրէնդումի զրութիւնը այժմ առհասարակ գործադրուում է Զւիցերիայում: Անկասկած, այդ զրութիւնը ժողովրդապետութիւնը աւելի ամրապնդում է և թոյլ չի տալիս, որ ներկայացուցիչները

մի խումբ կարողանայ, բռնապետական մի վարչու-  
թիւն կազմել: Ինչպէս Զւիցերիական պետութեան  
մէջ, նոյնպէս և աւելի ընդարձակ տարածութիւն  
ունեցող երկիրների կարիքներին կարող է շատ լաւ  
պատշաճիւ այդ դրութիւնը. ի հարկէ, ամեն բանից  
առաջ, այդ դրութիւնը ենթադրում է հասարակական  
զանգւածների քաղաքական զարգացումը, գաստիա-  
րակութիւնը:

Ժողովրդական վերհսկողութիւնից և ըէֆէրէն-  
դումից բացի, կայ և՛ մի այլ ձև, ժողովրդական նա-  
խաձեռնութեան իրաւունքը: Այս վերջինը անհրա-  
ժեշտ լրացումն է կազմում ըէֆէրէնդումը, դրու-  
թեան: Եթէ երբէք ժողովրդական միահեծանու-  
թեան սկզբունքի համեմատ բոլոր իշխանութիւն-  
ները բղխում են ժողովրդից, այդ ժամանակ, իւ-  
րաքանչիւր քաղաքացու օրէնքներ քւէարկելու ի-  
րաւունքի հետ միաժամանակ պէտք է տալ օրէնք-  
ներ առաջարկելու իրաւունքը: Բացարձակ միա-  
պետութեան մէջ այդ իրաւունքը պատկանում է  
միայն միապետին, պարլամենտական կառավարու-  
թեան մէջ այդ իրաւունքը պատկանում է նախա-  
րարներին և պատգամաւորներին, սակայն ճշմարիտ  
ժողովրդապետութեան մէջ այդ իրաւունքը պիտի  
պատկանի բոլորին: Անշուշտ, երբ օրէնքների նա-  
խաձեռնութիւնը լինում է լոկ անհատների կողմից,  
այդ դէպքում նա կարող է աւելի շուտ անյաջո-  
ղութեան մատնելի: Որպէսզի մի օրէնք կարողա-  
նայ քւէարկել, պէտք է, որ նա գոնէ պաշտպան-  
ների մի խումբ ունենայ: Ուրեմն, ժողովրդական  
նախաձեռնութեան իրաւունքի, այսինքն՝ ժողովր-  
դի կողմից օրէնսդրական ժողովին օրինագծեր  
ներկայացնելու տեսակէտից քաղաքական խմբակ-

ցութիւններն են աւելի, որ վճռական դեր կարող են խաղալ, նրանք են ընդհանրապէս, որ ազատ պրօպագանդայով հասարակական զանազան խաւերի կարծիքներն են պատրաստում և նրանց միջոցով օրէնսդրական նախագծեր ներկայացնում խորհրդարանին: Ժողովրդական նախաձեռնութեան իրաւունքը կատարեալ ժողովրդապետութեան դրութեան հաստատումն է, որ դարձեալ ընդունւած է Զիցերիական մի քանի կանտօններում:

Մեկ օրհնադիր ժողով.— Ընտրական եղանակները և ժողովրդական վերհսկողութեան տարբեր ձևերը պարզելուց յետոյ, այժմ հարց է ծագում թէ ներկայացուցչական ընտրութիւն մէջ օրէնսդիր մէկ թէ երկու ժողով պէտք է լինի, այսինքն՝ խորհրդարանը միայն պէտք է գոյութիւն ունենայ, թէ՞ ձերակոյտի գոյութիւնը ևս անհրաժեշտ է: Ինչպէս յայտնի է, ներկայումս այդ երկու ժողովներն են, որ կազմում են օրէնսդիր իշխանութիւնը: Դրանցից առաջինը միայն ընտրւում է ուղղակի, ընդհանուր, հաւասար և գաղտնի ձայնատուութեամբ, մինչդեռ երկրորդը ընտրական աւելի կամ նւազ սահմանափակումներ ունի: Սնգլիայում, օրինակ, երկրորդ ժողովը ազնւապետական ներկայացուցչութիւն է կազմում: Այնտեղ մասնակցում են լօրդերը, թագաւորական տոհմի անդամները, յայտնի կղերականները, և այլն: Բացի դրանից, մասնակցութեան իրաւունքը ժառանգական է: Ուրիշ երկրներում նոյնպէս, այդ գոյութիւնը գոյութիւն ունի կան երկիրներ էլ, ուր թէև այդ երկրորդ բարձրագոյն ժողովի գումարումը ընտրողական է, այնուամենայնիւ, նա հիմնւած է ցենզային ներկայացուցչութեան և կամ ընտրական սահմանափակ

եղանակի վրայ: Շնորհիւ այդ հանգամանքի, յիշնալ երկրորդ ժողովի մէջ մուտք են գործում հասարակական այնպիսի տարրեր, որոնք հակառակ են ժողովրդական շահերին և պահանջներին: Այդ իսկ պատճառով նրանք հակառակ են խորհրդարանի, ժողովրդի ներկայացուցիչների քէտարկած օրէնքներին: Ճշմարիտ ժողովրդապետութեան պաշտպանները կողմնակից են մէկ օրէնսդրական ժողովի, որ ընտրուում է ուղղակի ժողովրդի կողմից: Օրէնքը ժողովրդական կամքի արտայայտութիւնն է, իսկ ժողովրդական կամքը մէկ է, հետեւաբար և մէկ ժողով պէտք է լինի: Եթէ երկու ժողովներն էլ միևնոյն աստիճանով և միևնոյն եղանակով ներկայացնեն ժողովրդական կամքը, ապա նրանցից մէկը աւելորդ է, իսկ եթէ նրանցից մէկը աւելի բարձր ստորոգելիներ ունենայ և ժողովրդական հանրաքէտ / չընտրւի ու հետեւաբար չներկայացնէ ժողովրդական կամքը, ապա ժողովրդական միահեծանութեան առջև նա թուժը կը կանգնի և միշտ հակառակ կը լինի ժողովրդական ցանկութիւններից բղխած բարենորոգումներին:

Այսուհանդերձ, մենք ընդունում ենք, որ դաշնակցական պետութեան մէջ, կարող է արգարացի համարւել երկու օրէնսգիր ժողովների գոյութիւնը: Նրանցից մէկը կարող է ներկայացնել ինքնավար պետութիւնները, որոնք իրանց միահեծանութեան միայն մի մասը՝ արտաքին միահեծանութիւնը թողել են դաշնակցական պետութեան: Երկրորդը կարող է ներկայացնել երկրի ամբողջ քաղաքացիները և քէտարկել օրէնքներ բովանդակ երկրի համար, առանց իհարկէ դիպչելու ինքնավար երկրների իրաւունքներին: Առաջին ժողովը, ուրեմն, պատկե-

բացնում է երկրի դաշնակցական կազմը, իսկ երկրորդը՝ երկրի միութիւնը: Սակայն, այդ երկու ժողովներն էլ ազիտի ունենան ընտրական միւսնոյն եղանակը՝ ժողովրդական միահեծանութեան սկզբունքի բոլոր հետևութիւններով:

Իսկ ոչ-դաշնակցական երկրներում, որպէսզի ժողովրդական միահեծանութիւնը լայնօրէն գործադրւի, հարկաւ ոչ է որ գաղանի, ուղիակի, ընդհանուր և հաւասար ձայնաւութեան եղանակի, համեմատական ներկայացուցչական դրութեան, ժողովրդական վերահսկողութեան ու օրէնսդրական նախաձեռնութեան իրաւունքի հետ միաժամանակ՝ մէկ օրէնսդիր ժողով գոյութիւն ունենայ միայն՝ ձյմարիտ, կատարեալ ու ամբողջական ժողովրդապետութիւնը պահանջում է միայն այդ եղանակը: Բոլոր միւս ձևերը չեն համապատասխանում ժողովրդական իրական շահերին:

Իշխանութիւնների բաժանման սկզբունքը այն է, որ ի տեսակէտով պետութեան զանազան իշխանութիւնները պէտք է բաժանւեն մի քանի միմիանցից անկախ մասերի, — օրէնսդիր, գործադիր և դատաստանական:

Այդ թէ՛որիայի պատճառով ծագումը սկսում է անգլիական Սահմանադրութիւնից: Ամերիկեան յեղափոխութիւնն ու ֆրանսական յեղափոխութիւնը այդ սկզբունքը ընդունեցին և այն ժամանակից մինչև այժմ նա նորագոյն սահմանադրութեան հիմունքներից մէկն է կազմում:

Եթէ մի կատարավարութեան մէջ իշխանութիւնների բաժանումն չլինի, այն ժամանակ քաղաքական ազատութիւնը պէտք խափանւած նկատելի:

Generated on 2016-07-15 10:56 GMT / http://hdl.handle.net/2027/uc1.ax0001605955  
Public Domain, Google-digitized / http://www.hathitrust.org/access\_use#pd-google



Արդարև, երբ մի անձի կամ վարչական մի մարմնի մէջ կեդրոնանան մի քանի իշխանութիւններ, օրինակ, գործադիր և օրէնսդիր, այդ դէպքում երկրի օրէնքները կլինեն բացարձակ բռնապետական: Եթէ օրէնսդիր իշխանութիւնը կապւած լինի դատաստանական իշխանութեան հետ և այդ բոլորը ներկայացնէ մի անձն և կամ մի ժողով, քաղաքացիների կեանքն ու ազատութիւնը բռնաբարւած կը լինի: Կամ եթէ դատաստանական ու գործադիր իշխանութիւնները միացած լինեն, քաղաքացիները իրանց իրաւական գործառնութիւնների մէջ կը կորցրնեն իրանց ազատութիւնը, մի խօսքով՝ իշխանութիւնների բաժանումը մի երկրի քաղաքական ազատութեան համար բացարձակ ու էական անհրաժեշտութիւն է, առանց որի բռնակալութիւնն ու կամայականութիւնը պիտի կազմէին ընդհանուր օրէնքը: Անկախ իշխանութիւնների ժամանակ, իրաքանչիւր իշխանութիւն իր գործունէութիւնը սահմանափակում է իր իրաւասութեան շրջանակում և այդպիսով բռնութիւններն ու ճնշումները դառնում են անկարելի: Ինչպէս ասացինք, երեք իշխանութիւն պէտք է լինի, — օրէնսդիր, գործադիր և դատաստանական: Սակայն, այդ իշխանութիւններից միայն օրէնսդիրը էական, առաջնակարգ նշանակութիւն ունի, որովհետև օրէնքների յայտարարութեան իրաւունքը պատկանում է նրան, այսինքն՝ ժողովրդական կամքի ուղղակի արտայայտիչը նա է: Միւս իշխանութիւնները, գործադիրն ու դատաստանականը, իրանց գործունէութեան մէջ պիտի ղեկավարւին գլխաւորապէս օրէնսդիր ժողովի՝ պարլամենտի մշակած ու գծած օրէնքներով: Ներկայումս, սակայն, գործնականու-

Թեան մէջ օրէնսդիր իշխանութեան այդ առաջնակարգ նշանակութիւնը և նրանից անմիջականօրէն բղխող մի շարք հետութիւնները չեն ընդունւած և գործադիր իշխանութիւնը եթէ ոչ աւելի՝ գոնէ պակաս նշանակութիւն չունի օրէնսդիրից :

Ներկայումս օրէնսդիր և գործադիր իշխանութիւնների բաժանման ընդունւած սկզբունքից բըղխում են հետևեալ կէտերը .—

Ա.— Գործադիր իշխանութիւնը չի կարող իր հրովարտակներով ոչ մեկնաբանել, ոչ փոփոխել և ոչ էլ ջնջել մի օրէնք :

Բ.— Գործադիր իշխանութիւնը չի կարող՝ հրովարտակի միջոցով՝ կանոնաւորել այն խնդիրները, որոնց համար անհրաժեշտ է մի օրէնք :

Այս հետևութիւններով, սակայն, երկու իշխանութիւնների իրաւասութեան սահմանները որոշակի կերպով չեն գծուած : Կարելի է ասել, որ դրանք ընդհանուր բնոյթ են կրում զանազան երկիրների օրէնսդիր ու գործադիր իշխանութիւնների անջատման սկզբունքի տեսակէտից :

Բայց որպէսզի պարզ ու որոշ լինեն այդ իշխանութիւնների բաժանման սահմանները, նրանց փոխադարձ յարաբերութիւնները, ցոյց տանք այն մի քանի տարբեր ձևերը, որոնց վրայ հիմնւած են օրէնսդիր և գործադիր իշխանութիւնների բաժանումը :

Մի քանի սահմանադրութիւններ աշխատել են, որքան կարելի է, օրէնսդիր և գործադիր իշխանութիւնները իրարից անբողջապէս զատել և դարձնել բոլորովին անկախ : Իբրև տիպ կարող է ծառայել Միացեալ-Նահանգների այսօրւայ սահմանադրութիւնը : Բաժանող գծերը հետևեալներն են :

Ա.— Նախարարների ընտրութիւնը եւ դերը:

Նախարարները գործակալներն են գործադիր իշխանութեան, որի հետ միասին նրանք կազմում են գործադիր մարմինը: Իբրև այդպիսին, նրանք չեն կարող միաժամանակ օրէնսդիր ժողովի անդամ լինել: Սահմանադրութեան հինգերորդ յօդուածի արամադրութեան համաձայն՝ հասարակական պաշտօն վարող ոչ մի անձն չի կարող անդամ լինել օրէնսդիր ժողովներից, խորհրդարան և ծերակոյտ, ուէ մէկին, քանի նա գտնւում է պաշտօնի մէջ: Այդ օրէնքը ընդհանուր է ինչպէս նախարարների, այնպէս էլ միւս պաշտօնեաների համար:

Լինելով գործադիր իշխանութեան գործակալներ, նախարարները, հետևաբար, օրէնսդրական ժողովի մէջ չեն կարող ոչ մուտքի և ոչ էլ խօսքի իրաւունք ունենալ: Միւս կողմից, օրէնսդիր ժողովի հետ յարաբերութեան մէջ չլինելով, նրանք կախումն ունեն միայն գործադիր իշխանութեան անւանակրից՝ նախագահից: Նրանցից իւրաքանչիւրը կառավարում է իրան յանձնւած պաշտօնի գործերը, և այդ գործերից դուրս նա մասնակցում է ընդհանուր քաղաքականութեան այն չափով միայն, որ չափով նախագահը յարմար է տեսնում:

Նախագահը ընտրւում է ժողովի կողմից երկաստիճան հանրաքւէով. նա կազմում է իր կարիւնետը. մինիստրական խորհուրդը, որին ծերակոյտը շատ հազւագիւտ պարագաներում միայն չի վաւերացնում: Նախագահը, ուրեմն, իր կողմից ըստ իր կամքի ընտրում, պահում կամ հրաժարեցնում է նախարարներին: Սրանք ինչպէս տեսնւում է, կա-

աւարութեան գործերի ուղղութեան վրայ մասնաւոր կամ հաւաքական ազդեցութիւն չունեն և միաժամանակ քաղաքական պատասխանատուութիւնից ազատ են օրէնսդիր ժողովներին առաջ:

Բ. Գործադիր իշխանութիւնը օրենսդրութեան չի մասնակցում. — Դա արդէն բաժանման սկզբունքի արամաքանական հետեւութիւնն է: Միայն օրէնսդիր ժողովն է, որ օրէնսդրական իրաւասութիւն ունի: Գործադիր իշխանութիւնը օրէնքների առաջարկութեան և նախաձեռնութեան իրաւունքից զուրկ է բոլորովին: Նա չի կարող ոչ ուղղակի և ոչ էլ կողմնակի՝ նախարարների միջոցով՝ օրէնքի առաջարկներ ներկայացնել: Սակայն, մի տարօրինակ հակասութեամբ, գործադիր իշխանութիւնը օրէնքների նախաձեռնութիւն չունենալով հանդերձ՝ կարող է արգելք դնել օրէնսդիր ժողովի քէարկած օրէնքներին և այդպիսով թոյլ չտալ օրէնքի հրատարակութիւնը: Նախագահի այդ արգելքի, վէտօի իրաւունքը, իհարկէ, դէմ է իշխանութիւնների բաժանման սկզբունքին: Սակայն վէտօից յետոյ, եթէ նոյն օրէնքը օրէնսդիր երկու ժողովների ձայների երկու-երրորդ մեծամասնութիւնը գտնէ, ինչ որ դժար է, այդ դէպքում նախագահը ստիպւած է վաւերացնել: Ձայների փոքրամասնութեան ժամանակ, օրէնքը այլևս մեռած է համարոււմ: Նախագահական այդ վէտօի իրաւունքը հաստատուել է ներկայացուցչական ընտրութիւնների ղեկավարութեան հակազդեցութեան համար, որպէսզի օրէնսդիր իշխանութիւնը իրան չենթարկէ գործադիր իշխանութիւնը: Սակայն, այդ հանգամանքը ծառայում է շատ անգամ իբր մի խոչնդատ երկրի օրէնսդրութեան զարգացման համար, որովհետև ժողովրդա-

յին խաւերին ինպատակ քւէարկւած օրէնքները կարող են հանդիպել նախագահի դիմագրութեան:

Վէտօի իրաւունքը ունենալով հանդերձ՝ նախագահը ժողովները լուծելու իրաւունքը չունի, որը ինքնին բացորոշ բռնաբարումը կլինէր իշխանութիւնների բաժանման սկզբունքին:

Գործադիր իշխանութեան ամենածանր գործողութիւնների համար ամերիկեան սահմանադրութիւնը ծերակոյտին միայն տալիս է մի շարք ստորագելիներ: Համաձայն գրանց, վերոյիշեալ գործողութիւնները, — բացի պատերազմի յայտարարութիւնից, — որոնք իրաւական բնաւորութիւն են կրում, պիտի ենթարկեն ծերակոյտի հաւանութեան և վաւերացման: Այդ մասին այսպէս է ձեւակերպում սահմանադրութեան յօդուածը. «նախագահը իրաւունք ունի, ծերակոյտի խորհրդով և հաւանութեամբ, դաշինքներ կնքել, անւանակարգել դեսպաններ, հասարակական նախարարներ, պաշտօնեաներ, հիւպատոսներ, բարձրագոյն պալատի գատաւորներ, և այլն»: Սահմանադրութեան այդ ամբողջ տրամադրութիւնը յարգւում է խստօրէն, բացի նախարարների նշանակումից, որը ծերակոյտը վաւերացնում է սովորաբար առանց մերժելու: Իր օրէնսդրական և գործադրական իրաւասութիւններով միասին, ծերակոյտը ուրեմն, կազմում է մի տեսակ կառավարական խորհուրդ, որի իշխանութեան սահմանները բաւական ընդարձակ են:

Գործադիր իշխանութեան առհասարակ բոլոր գործողութիւնների վերահսկողութեան համար գոյութիւն ունի օրէնսդիր ժողովների մշտական յանձնախմբերը, որոնցից մէկը ընտրւում է նոյն ինքն ժողովների կողմից, իսկ երկրորդը՝ նախագահի

կողմից:

Այդ յանձնախմբերը նախարարների ունեցած վարչութեան վրայ անդադրում հսկողութիւն են գործ դնում և կայացնում են կարևոր որոշումներ: Այդ կերպով օրէնսդիր իշխանութիւնը հսկում է գործադիր իշխանութեան վրայ: Մնայուն յանձնախմբերը իրաւունք ունեն նոյն իսկ իրանց առջև կոչելու նախարարներին և նրանց հարցոյ փորձեր ուղղելու իրանց գործունէութեան եղանակների և ուղղութեան նկատմամբ:

Այսպէս ինչպէս տեսնուում է, իշխանութիւնների բաժանումը Միացեալ-Նահանգներում տեսականօրէն է միայն, մինչդեռ գործնականութեան մէջ ընդհակառակն է, երկու իշխանութիւնների փոխադարձ յարաբերական կապը շատ սերտ լինելով և առաջինը՝ օրէնսդիրը վերհսկողութեան իրաւունք ունենալով երկրորդի՝ գործադրի վրայ:

Այսպէս է, իր ընդհանուր գծերով, Միացեալ-Նահանգների օրէնսդիր և գործադիր իշխանութիւնների փոխադարձ յարաբերութեան ձևը: Այդ ձևը մուտք է գործել և Ամերիկեան միւս հասարակապետութիւնների մէջ: Եւրոպայում, մեծ մասամբ, պարլամենտական կառավարութեան սխաւէմն է որդեգրւած, որը շատ ու շատ կողմերով զանազանւում է Միացեալ-Նահանգների Դաշնակցական կառավարութեան իրաւական բնաւորութիւնից:

Պարլամենտական կառավարութեան մէջ՝ օրէնսդիր և գործադիր իշխանութիւնների միջև այնպէս խիստ բաժանումն չկայ, ինչպէս Ամերիկեան դաշնակցական կառավարութեան մէջ: Այստեղ բաժանումը աւելի մեղմ է: Գործադիր իշխանութեան պարագլուխը մի թաղաւոր և կամ մի նախագահ

է, նայելով թէ սահմանադրական միապետութիւն է, թէ հանրապետութիւն: Եթէ նոյն իսկ այդ պարագային օրէնսդիր ժողովի կողմից ընտրւած էլ լինի, չի կարելի հրաժարեցնել: Նրա ստորագելինքը գործադիր և օրէնսդիր են: Օրէնսդրական տեսակէտով իրաւունք ունի՝ ծերակոյտի հաւանութեամբ՝ լուծել ժողովրդական պալատը՝ խորհրդարանը: Բացի դրանից նա իրաւունք ունի և նախարարական մարմնի միջոցով օրէնքի նախագծեր ներկայացնելու օրէնսդրական ժողովին:

Գործադրական տեսակէտով նրա ունեցած իրաւունքները սահմանափակ են, որովհետև ամենազլխաւոր գործողութիւնների համար, ինչպէս են պատերազմի յայտարարութիւնը, խաղաղութեան, սնտեսական դաշինքների կնքումը, և այլն, օրէնսդրական ժողովի հաւանութիւնը անհրաժեշտ է: Նախարարների անւանումի իրաւունքը սկզբունքով պատկանում է նրան, սակայն, ընդունւած սովորութեան համաձայն՝ նա ընտրում է միայն մի նախարարապետ, որը անպայման խորհրդարանի մեծամասութեան վստահութիւնը պիտի վայելէ: Միւս նախարարները ընտրւում են այդ նախարարապետի կողմից, սակայն, դրանք էլ, ինչպէս ինքը նախարարապետը, խորհրդարանի մեծամասնութեան վստահութիւնը պիտի վայելեն:

Նախարարութեան դերը բաւական մեծ է: Նա թէև գործադիր իշխանութեան բարձրագոյն գործակալութիւնն է համարւում, սակայն, գործադրական տեսակէտով իրական հեղինակութիւն ունի: Օրէնսդիր և գործադիր իշխանութիւնների միջև նա կատարում է միջնորդի դեր, օրէնսդիր ժողովի նիստերին մասնակցում և խօսք է վերցնում՝ գոր-

ծաղիր իշխանութեան պետի օրէնքի նախաձեռնութիւնը պաշտպանելու և կամ ուղղած հարցերին ու հարցապնդումներին պատասխանելու համար Միւս կողմից, նա կազմում է նախարարական խորհուրդ՝ հանրապետութեան նախագահի կամ թագաւորի նախագահութեան տակ, կառավարութեան ընդհանուր քաղաքականութեան ուղղութիւնը որոշելու համար:

Բացի դրանից, նախարարութիւնը կազմում է մի կարինետ՝ որ զբաղւում է բնթացիկ հարցերի քննութեամբ: Շնորհիւ այդ հանգամանքի, պարլամենտական կառավարութիւնը կոչւում է կարինետի կառավարութիւն: Գործադիր իշխանութեան պարագլուխը անպատասխանատու լինելով, նրա իւրաքանչիւր գործողութիւնը ստորագրւում է նախարարութեան կողմից: Յիշեալ բոլոր պատճառներով նախարարութիւնը օրէնսդիր ժողովի՝ պարլամենտի առաջ հաւաքաբար դառնում է պատասխանատու: Նա պարտաւորւում է իր գործողութիւնների համար պարլամենտի հարցապնդումներին բաւարարութիւն տալ, հակառակ դէպքում մեծամասնութեան քւէտով կարող է անմիջապէս հրաժարեցւել: Այդպիսով, ուրեմն, օրէնսդիր ժողովը կարող է վերհսկողութիւն գործ դնել գործադիր իշխանութեան վրայ և ստիպել նրան վտանգաւոր միջամտութիւնների չձեռնարկելու՝ օրէնսդիր իշխանութեան հպատակեցնելու դիտաւորութեամբ:

Պարլամենտական կառավարութեան մէջ օրէնսդիր և գործադիր իշխանութիւնների բաժանման սահմանները բացատրելուց յետոյ, այստեղ աւելորդ չենք համարում յիշեցնել, որ պարլամենտական կառավարութիւնը չպէտք է շփոթել ներկայացուց-



չակսն կառավարութեան հետ: Մի կառավարութիւն կարող է ներկայացուցչական լինել, բայց պարլամենտական չլինել: Այսպէս, Միացեալ-Նահանգների կառավարութիւնը ներկայացուցչական է, որովհետեւ օրէնսդիր ժողով ունի, բայց պարլամենտական չէ, որովհետեւ, ինչպէս բացատրեցինք, իշխանութիւնների բացարձակ բաժանման սկզբունքի վրայ է հիմնւած և նախարարութիւնը չունենալով մասնակցութիւն օրէնսդիր ժողովին, պատասխանատու չէ նրա առջև, այլ նախագահի առջև միայն:

Պարլամենտական կառավարութիւն գոյութիւն ունի այժմ Եւրոպայի գրեթէ բոլոր երկիրներում: Ամերիկեան կառավարութեան և եւրոպական պարլամենտական կառավարութեան կողքին կայ կառավարական մի այլ ձև, որ գոյութիւն ունի Զիւցերիայում: Այնտեղ սկզբում գործադիր իշխանութիւնը կազմում էին 5, 7 կամ 9 նախարարներ, որոնք ընտրւում էին օրէնսդիր եզակի ժողովի կողմից, որը միաժամանակ կոչւում է և մեծ Խորհուրդ: Իւրաքանչիւր նախարար կառավարում է իր մասնաւոր գործերը և ընտրւում էր մի որոշ ժամանակամիջոցի համար, ընդհանրապէս օրէնսդիր ժողովի մէկ շրջանի համար: Նրանք չէին կարող հրաժարեցւել, չէին կարող օրէնսդիր ժողովի անդամ լինել, թէև ներկայանալ, նախագծեր առաջարկել և վիճարանութեան մասնակցել կարող էին: Սակայն, իրանց առաջարկների վրայ պնդել չէին կարող և եթէ ժողովը հակառակէր նրանց կը հպատակէին:

Սակայն, մի քանի տարուց ի վեր յայտնի փոփոխութիւն է կատարւել: Նախարարները յաճախ

ընտրուում են ոչ թէ օրէնսդիր ժողովի կողմից, այլ ուղղակի ժողովրդի կողմից: Միայն ութ կանտոններ կան, ուր նրանք ընտրուում են ժողովի կողմից: Ինչ որ կանտոնների վերաբերմամբ է, նոյնն է և՛ ամբողջ համադաշնակցութեան համար: Դաշնակցական Խորհուրդը, որ կազմում է գործադիր իշխանութիւնը, ընտրուում է Յ տարւայ համար դաշնակցական օրէնսդիր ժողովի կողմից: Այս վերջինը բաղկացած է երկու պալատից՝ Ազգային Խորհուրդից և Պետական Խորհուրդից: Առաջինը ընտրուում է Յ տարւայ համար, իւրաքանչիւր կանտոնի ընտրողների կողմից ուղղակի հանրաքուէով: Երկրորդը ընտրուում է իւրաքանչիւր կանտոնի ժողովրդային ժողովի կողմից 5 տարւայ համար և բաղկացած է 44 անդամներից, իւրաքանչիւր կանտոն երկու անգամ ընտրելով: Դաշնակցական Խորհուրդը նախարարների մի խորհուրդ է պարզապէս, որ կազմւած է 7 անդամներից և որի նախագահը, իբր համադաշնակցութեան նախագահ, ընտրուում է միմիայն մէկ տարւայ համար և չի կարող վերընտրելի լինել հետեւեալ տարին: Նա պատուոյ առանձնանորհումներ ունի միայն, ուրիշ ոչինչ: Նախարարները դաշնակցական օրէնսդիր ժողովի անդամ չեն կարող լինել, բայց գործօն մասնակցութիւն կարող են ունենալ վիճաբանութիւններին: Օրէնսդրական տեսակէտով նրանք նախաձեռնութեան իրաւունք ունեն և կարող են օրէնքի առաջարկներ ներկայացնել: Նախարարը վէտօի իրաւունք չունի և չի կարող ոչ իսկ լուծել կամ արձակել օրէնսդիր ժողովի գումարումը:

Ինչպէս նկատուում է, նախարարներից զատ գործադիր իշխանութեան ուրիշ անւանակիր չկայ

իրօք: Նոյն իսկ օրէնքի նախաձեռնութեան կողմից, նրանցից ամեն մէկը, միւսներին անկախօրէն, կարող է դաշնակցական ժողովին ներկայացնել իր նախագիծը, և պատահել է, որ դաշնակցական Խորհուրդի մէկ անդամի օրէնսդրական առաջարկը քննադատուել է միւս անդամների կողմից:

Դաշնակցական Խորհուրդի, ուրեմն, գործադիր իշխանութեան իրաւասութեան սահմանների մէջ մտնում են արտաքին գործերի ղեկը, հեռագիրը, պօստը և մի շարք այլ ճիւղեր:

Այսպէս ուրեմն, Զւիցերական կառավարութեան ձեռով օրէնսդիր իշխանութիւնը առաջնակարգ նշանակութիւն ունի և գործադիր իշխանութիւնը աւելի երկրորդական տեղ է բռնում: Ինչ ասել կուղէ, որ ժողովրդապետութիւնը արտայայտում է միայն այդ դրութեամբ: Միացեալ-Նահանգների նախագահի վէտօի իրաւունքը օրէնսդիր ժողովի քէտարկած ուէ մի օրէնքի դէմ և պարլամենտական կառավարութեան մէջ նախագահի կամ թագաւորի օրէնսդիր ժողովի յուժման իրաւունքը հակառակ են ժողովրդական միանեծանութեան սկզբունքին, ըստ որում ժողովրդական հանրաքէտով ընտրւած օրէնսդիր ժողովն է միայն, որ ներկայացրնում է ժողովրդական ուղղակի կամքը, և իբրև այդպիսին, նա երբէք չի կարող ենթարկուել գործադիր իշխանութեան:

Բացի այս երեք տարբեր ձևերից, կայ և մի այլ ձև, որ իր ընդհանուր կողմերով նման է Զւիցերականին. կարելի է ասել, որ շատ քիչ տարբերութիւն ունի նրանից: Կառավարական այս վերջին ձևը գործադիր իշխանութեան զրկում է անկախութիւնից և ամբողջապէս հարատակեցնում է

օրէնսդիր իշխանութեան: Ներկայացուցչական կառավարութիւնը այդ սխառեմի մէջ բաղկացած է ոչ թէ երկու, այլ մէկ օրէնսդիր ժողովից, որը ընտրուում է ուղղակի, գաղտնի, հաւասար և ընդհանուր ձայնատուութեան եղանակով և որը ներկայացնում և գործադրում է ժողովրդական կամքը՝ ուղղակի կառավարութեան պէս, միայն այն զանազանութեամբ, որ այնտեղ ամբողջ ժողովուրդը ուղղակի կերպով է վարում պետական գործերը, իսկ այստեղ ընտրւած անդամներին կալմած ներկայացուցչական, պատգամաւորական ժողովն է, որ կատարում է նոյն դերը: Այդ ժողովը ազգային սիալ ներկայացուցչութիւնն է և նրան հակակշռող ոչ մի այլ իշխանութիւն գոյութիւն չունի: Նա միայն կարող է ճշմարտապէս խօսել և վճռել ժողովրդի անունով: Գործադիր իշխանութեան գործակալները ընտրուում են նրա կողմից և կարող են հրաժարեցել նրա կամքով: Սահմանադրական իրաւունքի հարցերով մասնաւորապէս զբաղւող մի յայտնի գրող հետեւեալ կերպով է բնորոշում օրէնսդիր իշխանութեան էութիւնը. «Ոչ ոք, ասում է նա, չի կարող ժխտել, որ ժողովրդի ներկայացուցիչները կառավարական բոլոր հարցերում գերազոյն հեղինակութիւն են ներկայացնում և վարչութիւնը՝ կառավարութեան մէջ՝ պարզապէս բիրտօնների աշխատանքն է: Օրէնսդրութիւնը առաջնակարգ ոյժն է: Օրէնք կազմելու իշխանութիւնը իր բնութեամբ և էութեամբ, կառավարելու իշխանութիւնն է և այդ իշխանութիւնը պատկանում է ներկայացուցչական ժողովին: Սա իրուունք ունի իր մշտական և խիստ հսկողութեան տակ ունենալ գործակալներ, որոնք յանձնառու լինեն

գործադրելու իր կամքը՝ պատասխանատու հանգամանքներով» :

Օրէնսդիր իշխանութեան էական նշանակութիւնը ընդունելով և գործադիր իշխանութեան երկրորդական կարևորութիւն տալով հանդերձ, մի շարք մտածողներ կողմնակից չեն, որ գործադիր իշխանութեան անդամներ ընտրեն օրէնսդիր ժողովի կողմից : Ֆրանսիական յեղափոխութեան յայտնի դէմքերից մէկը, օրինակ, ասում է այդ առթիւ . «գործադիր իշխանութեան գործակալները պէտք է էականօրէն ենթարկուեն օրէնսդրական իշխանութեան : Գործադիր խորհուրդը պէտք է լինի այն ձեռքը, այն աչքը . որոնցմով օրէնսդիրները կարողանան պործել և քննել իրանց օրէնքների գործադրութեան մանրամասնութիւնները և ստեղծած արդիւնքները : Սակայն, ազատ մի ժողովրդի հաստատութիւնները չեն կարող ստրուկ մի հպատակութեան պատկերը ընծայել : Եթէ գործադիր խորհրդի անդամները օրէնսդիր մարմնի գործակալներն են, չեն կարող միաժամանակ նրա ստեղծագործութիւնը լինել : Նա պէտք է ստիպէ նրանց հնազանդուել, բայց օրէնքով նրանք պէտք է ընտրուեն ժողովրդից և ոչ թէ օրէնսդիր ժողովից քանի որ նրանք ժողովրդի գործակալներն են և ոչ թէ երեոփոխանների, այնպէս որ նրանց կամայական հրաժարեցումը կարող էր մի մեծ ստրկական հպատակութիւն լինել» :

Անշուշտ, գործադիր իշխանութեան գործակալների ընտրութիւնը ժողովրդի կողմից աւելի նախընտրելի ու նպատակայարմար է : Այդ պարագան համաձայն է և այն սկզբունքին, ըստ որում բոլոր պաշտօնեաները ընտրուում են ժողովրդից :

Ներկայումս ժողովրդական բոլոր յառաջադէմ կուսակցութիւնները աշխատում են իրագործել կառավարական այս վերջին սխտեմը, որ իրանց քաղաքական ծրագրի անբաժան մասն են արել :

Գործադիր և օրէնսդիր իշխանութիւնների այս տարբեր յարաբերական ձևերը ցոյց տալուց յետոյ, ընթերցողի համար դիւրին կլինէր հասկանալ թիւրքիայում Միդհատեան սահմանադրութեան գործադիր և օրէնսդիր իշխանութիւնների յարաբերական գծերը : Այստեղ օրէնսդիր իշխանութիւնը կեդրոնացած է գործադիր իշխանութեան պետի՝ սուլթանի անձնաւորութեան մէջ և ներկայացուցչական ժողովը, ընտրւած անուղղակի հանրաքւէով, զուրկ է օրէնսդրական իրաւունքներից և հետևաբար հպատակւած է գործադիր իշխանութեան : Այդ տեսակէտից Միդհատեան սահմանադրութիւնը նւիրագործել է բռնակալութիւնն ու կամայականութիւնը :

Դատաստանական իշխանութիւն .— Դատաստանական իշխանութիւնն էլ, ինչպէս ասացինք, կազմում է մի անկախ իշխանութիւն, առաջնորդւելով միայն այն օրէնքներով, որ բղխում են օրէնսդիր ժողովից : Նրա գոյութեան իրաւունքը պայմանաւորւում է օրէնքների զանցառութիւնը զսպելու և ընկերութեան անդամների մէջ ծագած ընդհարումներին մի խաղաղ լուծումի տալու անհրաժեշտութեան մէջ : Դատաստանական իշխանութիւնը, հետևաբար, պէտք է լինի անկախ ամեն մի ճնշումից ու ազդեցութիւնից, որպէսզի կարողանայ ըստ արժանւոյն կատարել իր անկողմնակալ դերը : Այդ սկզբունքը ընդունւած և յայտարարւած է այժմ բոլոր լայն սահմանադրական կարգեր ունեցող եր-

կիրներում: Դատաստանական իշխանութեան անկախութիւնը ենթադրում է երկու անհրաժեշտ պայման, — դատաւորների, իրաւարարների ընտրութիւնը ժողովրդի կողմից և նրանց անփոփոխելիութիւնը: Ներկայումս թէև սկզբունքով շատ տեղ ընդունւած, ճանաչւած է դատաստանական իշխանութեան անկախութիւնը, այնուամենայնիւ, նա ենթարկւած է գործադիր իշխանութեան, այն պարզ պատճառով, որ դատաստանական պաշտօնեաները նշանակւում են գործադիր իշխանութեան կողմից, մի հանգամանք, որ պաշտօնեաներին ենթարկում է ադմինիստրացիայի՝ գործադիր իշխանութեան ազդեցութեան: Այդպիսով արդարագատութիւնը փոխանակ անաչառ, անկոմմսակալ, իրաւունքի հիմքերի վրայ մնալու, դառնում է կողմնապահ, ընդունում է դասակարգային տիրապետութեան մի եղանակ: Եթէ ժողովրդական միահեծանութեան սկզբունքի համաձայն, բոլոր իշխանութիւնները բղխում են ժողովրդից, ապա դատաստանական պաշտօնեաները ուղղակի կերպով պիտի ընտրւեն ժողովրդի կողմից: Այդ պայմանով միայն պաշտօնեաների անփոփոխելիութիւնն էլ կարող է օգտակար նշանակութիւն սւնննալ. այլապէս, երբ դատաւորները գործադիր իշխանութեան կողմից ընտրւեն և միաժամանակ անփոփոխելի լինեն, անիրաւութիւնը կարող է յարատւ բնաւորութիւն ստանալ: Ընտրութիւնը ժողովրդի կողմից կատարւելով, ոչ գործադիր և ոչ էլ օրէնսդիր իշխանութիւնները, իրաւունք չունեն հրաժարեցնել դատական պաշտօնեաներին: Նրանց անփոփոխելիութիւնը այդ դէպքում միայն համպատասխանում է ճշմարիտ արդարագատութեան հիմունքներին: Բայց,

իհարկէ, այդ անփոփոխելիութիւնը չպէտքէ բացարձակ մի բնաւորութիւն ունենայ: Դրա համար նախապէս որոշ պայմաններ պէտք է գծուեն, մի քանի պարագաներ նախատեսուեն, որոնք են՝ անարժանաւորութիւն, անընդունակութիւն, չարաչար պաշտօնավարութիւն, և այլն: Առանց այդ հանգամանքների նախաքննութեան, դատաստանական պաշտօնեաների անփոփոխելիութիւնը կարող էր բռնապետական և կամայական դատական վարչութիւն ստեղծել:

Դատաստանական պաշտօնեաների ընտրութիւնը ժողովրդի կողմից ունի, անշուշտ, մեծ նշանակութիւն: Նա պաշտօնեային դարձնում է, բոլորովին անկախ գործադիր իշխանութեան հանդէպ: Միւս կողմից, սակայն, ժողովրդական ընտրութիւնը պաշտօնեային, դատաւորին կարող է ենթարկել ընտրական մարմնի ազդեցութեան: Այն երկրում, ուր քաղաքական առաքինութիւնն ու ազնւութիւնը զարգացած չեն, ուր դեռ քաղաքական գիտակցութիւն և ընտրական լաւ բարքեր չկան, այդ ազդեցութիւնը կարող է, բնականաբար, լաւ արդիւնքներ չտալ: Մանաւանդ եթէ ընտրւած դատաւորը զուրկ է անհրաժեշտ գիտական մասնաւոր ծանօթութիւններից ու դրական փորձառութիւնից, հետեւանքները աւելի վատ կը լինեն: Այդ անյարմարութիւնից խուսափելու համար պէտք է աշխատել կանխօրօք որոշ երաշխաւորութիւնների ստեղծել՝ անօրինական ընտրութիւնը խափանելու և ազդեցութեան հետեւանքները չէզոքացնելու համար: Ներկայումս շատ իրաւագէտներ պատճառաբանելով վերոյիշեալ անպատեհութիւնները, առաջարկում են, որ դատաստանական պաշտօնեաների



նշանակումը գործադիր իշխանութեան իրաւասութեան սահմանների մէջ լինի. սակայն, այս դէպքում ժողովրդապետութեան հակառակ պէտք է գնալ, որովհետեւ դրանով դատաստանական իշխանութիւնը կը հպատակէր գործադիր իշխանութեան, իսկ այդ հանգամանքը արդար իրաւարարութիւնը չէր կարող երաշխաւորել, ինչպէս որ այդ դիտել ենք վերևում:

Ինչ որ ասում ենք պատժական դատարանների համար, նոյնը կարող ենք ասել և մասնաւոր դատարանների համար, ինչպէս են՝ վաճառականական դատարան, աշխատանքի իրաւարար դատարաններ, որոնց յանձնւած է առանձին արհեստական հարցերի քննութիւնը:

Ներկայումս զանազան երկիրներում զանազան եղանակով է լինում դատաստանական պաշտօնեաների ընտրութիւնն ու անփոփոխելիութիւնը: Միացեալ-Նահանգներում դաշնակցական դատարանի դատաւորները նշանակւում են՝ ժամանակաւոր կերպով՝ հանրապետութեան նախագահի կողմից. իսկ նահանգային դատաւորները ընտրւում են ժողովրդի կողմից: Զւիցերիայում նոյնպէս նոյն դրութիւնը գոյութիւն ունի, միայն այն զանազանութեամբ, որ այստեղ դաշնակցական դատարանի դատաւորները ընտրւում են Դաշնակցական Խորհուրդի կողմից, որ, ինչպէս ասել ենք, նախարարների մի խորհուրդ է պարզապէս:

Ֆրանսիայում և ուրիշ մի քանի երկիրներում, դատաւորները նշանակւում են գործադիր իշխանութեան կողմից և անփոփոխելի են: Այս եղանակը, ինչպէս ցոյց տւինք, հակասութեան մէջ է դատաստանական անկախութեան օկղբունքի հետ

և ճշմարիտ ու արդար իրաւարարութիւն չի կարող երաշխաւորել՝ դատաստանական իշխանութեան հպատակեցնելով գործադիր իշխանութեան :

Ինչ վերաբերում է դատաստանական և գործադիր իշխանութիւնների փոխադարձ միւս յարաբերութեանց, առաջինը, բնականաբար չի կարող ենթարկւել երկրորդին և դատական գործերի քննութեան մէջ ու նրա հրահանգով ունէ մի դատի այս կամ այն ուղղութիւնը տալ : Դատաստանական իշխանութիւնը լիովին ազատ ու անկախ է դատական գործերի մէջ ունէ արտաքին մի մասնակցութիւնից : Իր վարչական իրաւասութեան մէջ մտնելով օրէնքի և իրաւունքի պաշտպանութիւնը, նա առանց ունէ խտրութեան ու բացառիկ մի հանգամանքի, պէտք է իր դատական արդարացի ու բաւարար լուծումը, վճիռը տայ՝ լինի այդ մի պետական պաշտօնեայի գործողութեան նկատմամբ, թէ երկու պարզ անհատների մէջ ծագած խնդիրների մասին : Ներկայումս, սակայն, վեհապետը անպատասխանատու ճանաչւելով, չի կարող օրինականապէս հետապնդել դատարաններում : Մի քանի երկրներում, պետական պաշտօնեաները նոյնպէս, իրանց անձնական անօրինական գործողութիւնների համար չեն դատւում նոյն կերպով, ինչպէս որ ընկերութեան այլ անդամները : Չա, իհարկէ, մի առանձնաշնորհում է, որ հակառակ է արդար իրաւարարութեան սկզբունքին, ըստ որում հաւասար և միատեսակ արդարադատութիւն պէտք է լինի ընկերութեան բոլոր անդամների համար, առանց դասակարգի և սեռի խտրութեան :

Օրէնսդիր և դատաստանական իշխանութիւնների փոխադարձ յարաբերութիւններից երեք գլխաւ-

թեան, ներկայուած ծերակոյտը միայն այդպիսի իրաւաբանութեան իրաւունք ունի :

Դատաստանական իշխանութիւնը կարող է ե՛սահմանադրական օրէնքների արժէքը վիճելի նկատել, առանց սակայն շեղելու նրանից, և նոր օրէնքների հրատարակութեան համար առաջարկներ ներկայացնել օրէնսդիր իշխանութեան: Ներկայուած նոյնիսկ այդ իրաւունքը ճանաչւած և գործադրուում է դատաստանական իշխանութեան կողմից :

ՔԱՂԱՔԱԿԱՆ — ՔԱՂԱՔԱՑԻԱԿԱՆ ԱԶԱՏՈՒ-  
ԹԻՒՆՆԵՐ

Նորարոյն սահմանադրական իրաւունքը այս խորագրի տակ հասկանում է այն բոլոր ազատութիւնները, որոնք անհատի զարգացման և կատարելագործութեան համար անհրաժեշտ պայմաններ են: Անհատը պէտք է լիակատար իրաւունք ունենայ արատօրէն զարգացնելու և մշակելու իր ֆիզիքական, բարոյական և մտաւորական կարողութիւնները, առանց վնասելու իր շրջապատին: Այն ինչ որ նրա մասնաւոր կեանքը, կարծիքը և խիղճըն են կազմում, պէտք է զերծ լինեն ամեն կաշկանդումից, կամայականութիւնից և բռնութիւնից: Նա պէտք է ունենայ խօսքի, գրչի լայն ազատութիւն: Իբրև մի քաղաքական կենդանի, ինչպէս ասում է յոյն փիլիսոփայ Արիստոտէլը, նա պէտք է ընկերութեան մէջ ապրի, գործէ և գոհացում տայ իր բոլոր կենսական պահանջներին: Եւ դրա համար անհրաժեշտ է, որ գոյութիւն ունենան մամուլի, հաւաքումների և ընկերակցութեաց ընդարձակ ազատութիւններ:

Քաղաքական-քաղաքացիական այս ազատու-

թիւնները հոշակեցան ֆրանսիական Մեծ Յեղափոխութեան ժամանակ, «Մարդու և Քաղաքացու Իրաւունքների Յայտարարութեամբ»: Այնուհետև եւրոպական բոլոր սահմանադրութիւնները լնդունեցին այդ սկզբունքը, որ ներկայումս ժողովրդական միահեծանութեան և իշխանութիւնների բաժանման սկզբունքների հետ միասին՝ նորագոյն սահմանադրական իրաւունքի հիմքն են կազմում:

Անձի եւ քնակարանի անձեռմխելիութիւն.— Անձի և քնակարանի անձեռմխելիութիւնը անհատազատութեան ամենաէական երաշխաւորութիւններից մէկն է: «Մարդու և Քաղաքացու Իրաւունքների Յայտարարութիւնը» մասնաւոր յօդւածներով ճշտել է այդ երաշխաւորութիւնը: Բէլճիքական սահմանադրութիւնը ևս գեղեցիկ մի սահմանաւորումն է տւել այդ մասին: Սահմանադրութեան 7-րդ յօդւածը ասում է.— «Անհատական ազատութիւնը երաշխաւորւած է: Ուէ մէկին հետապնդել կարելի է միայն օրէնքի նախատեսած պարագաների մէջ և նրա բնորոշած ձևով: Բացի բացայայտ յանցանքի (flagrant délit) դէպքից, ուէ մէկին կարելի է ձերբակալել միայն դատաւորի պատճառաբանեալ վճռագրով: Բնակարանը անձեռմխելի է: Ոչ մի այցելութիւն չի կարող տեղի ունենալ, եթէ ոչ միայն օրէնքի նախատեսած պարագաների մէջ և նրա սահմանած ձևով»: Անհատը, ուրումն, պէտք է զերծ մնայ կառավարութեան կամայական ճնշումներից: Նրա քնակարանը նոյնպէս, պէտք է ազատ մնայ ոստիկանութեան կամայական խուզարկութիւններից: Առանց դրան, ինչպէս շատ գեղեցիկ կերպով ասում է Բենիամին դը Կօնստանը, մարդկանց համար ոչ իւրազաղութիւն, ո՛չ արժա-

նապատուութիւն և ոչ էլ երջանկութիւն կարող է լինել: «Երբ կամայականութիւնը, — շարունակում է նա, — հալածում է մի անհատի, ամբողջ ընկերութիւնն է, որ տուժում է դրանից, որովհետև քաղաքացիական երաշխաւորութիւնները այլևս վերանում են»:

Անգլիայում անհատի անձն ու բնակարանը լիովին անձեռմխելի են: 1679 թւականին, պարլամենտը քարկել է habeas corpus-ի ակտը, ըստ որում առանց դատական օրինական վճռագրի՝ ոչ մի անհատ չի կարող ձերբակալուել և բանտարկուել: Այն դատաւորը կամ պաշտօնեան, որ անտես կառնէ այդ օրէնքը, ստիպւած է 500 ոսկու տուգանք վճարել: Այդ տրամադրութեամբ, անգլիացիք ընդունել են պաշտօնեաների պատասխանատուութիւնը: Ամեն մի պաշտօնեայ, երբ անհատի ազատութեան դէմ ապօրինի միջոցների կը դիմէ, պատասխանատու է օրէնքի առաջ: Աւելի ևս. պաշտօնեաների կամայականութեան դէմ եղած դիմադրութիւնը կատարելապէս օրինական մի միջոց է նրկատուում Սնգլիայում: Եթէ այդ դիմադրութեան ժամանակ մարդասպանութիւն պատահի, լիովին արդարանալի է: Հէնց այս պարագան է, որ Լորդ Չէթէմին իրաւունք է տւել յայտարարելու թէ՛ «my home is my castle», այսինքն՝ իմ տունը իմ բերդս է, ոչ թէ նրա համար, որ ամբողջիւններով պաշտպանւած է, այլ որովհետև թագաւորը չի կարող այնտեղ մտնել»:

Աւելորդ է ասել թէ՛ թիւրքիայում անձի և բնակարանի ապահովութեան ոչ մի երաշխաւորութիւն գոյութիւն չունի: Այստեղ թագաւորում է զապրիկի սանձարձակ կամայականութիւնը: Ամեն

րոպէ «օսմանեան փառիշտի հպատակներին» կեանքը և բնակարանը վտանգի տակ են. այդ է պատճառը, որ օսմանեան պատմութիւնը տարիներէ ի վեր իր զանազան ցեղերի ապստամբութիւններն է արձանագրում:

Որպէսզի անձի և բնակարանի անձեռմխելիութիւնը յարգւի և ապահովւի պաշտօնեաների կամ մայականութեան դէմ, անհրաժեշտ է, որ այս վերջինների պատասխանատուութեան սկզբունքը բնդունւի: Եթէ պաշտօնեան, ինչ վարչական դիրք և հեղինակութիւն էլ որ ունենայ, իմանայ, որ օրէնքի ոտնահարման դէպքում ինքը պիտի ստանայ իր արժանի պատիժը, այն ժամանակ նա չի յանդգնի ապօրինի քայլ առնելու:

Մամուլի ազատութիւնը.— Մամուլը, ասում են, հասարակական չորրորդ իշխանութիւնն է: Նա է պատրաստում հասարակական կարծիքը և ղեկավարում այն բոլոր հոսանքները, որ ստեղծւում է ընկերութեան մէջ:

Մամուլի ազատութիւնը ժողովրդական միահեծանութեան անհրաժեշտ լրացուցիչն է կազմում: Ոչ մի ճնշում, կաշկանդում չպէտք է գործադրուի նրա դէմ: Նրա միջոցով հասարակութիւնը պէտք է իրազէկ լինի քաղաքական, տնտեսական և ընկերային բոլոր երևոյթներին: Էինելով արտայայտիչը, ճշմարիտ թարգմանը հասարակական բոլոր զանգւածների, նա պէտք է լիակատար ազատութիւն ունենայ պաշտպանելու նրանց շահերը: Ճշմարիտ ժողովրդագետութեան պահանջն է այդ, որ նորագոյն սահմանադրական իրաւունքը բարձրաձայն հռչակել է:

Մամուլի միջոցով է, որ մատնանշւում են

զատ քննադատութեան կ'եթարկեն: «Վիճարանութիւնից լոյս է ծագում», —ասում են ֆրանսիացիք: Իսկ դա հնարաւոր է միայն այն ժամանակ, երբ մամուլը ազատ է: Հասարակութիւնը կարող է ազատ քննութեան ենթարկել գոյութիւն ունեցող ըմբռնումները և բոտ այնմ որոշ ուղղութիւն և դիրք բռնել:

Մամուլի ազատութեան դէմ ձեռք առնւած ամեն միջոց ժողովրդական ազատութեան բռնաբարումն է նշանակում: Եւ փորձը ցոյց է տալիս, որ որքան մի երկրում մամուլը կաշկանդւած է, այնքան նա աւելի մեծ ազդեցութիւն ունի հասարակութեան վրայ: Այն երկիրներում, ուր՝ ընդհակառակը՝ մամուլը չափազանց լայն ազատութիւն է վայելում, այնքան աւելի նւազ է նրա ազդեցութիւնը ժողովրդի վրայ: Ուրեմն, ոչ մի պատճառ չկայ, որ մամուլը կաշկանդւի:

Թիւրքիայում ամեն սէկը մեզանից գիտէ, թէ որքան արգելքներ ու սեղմումներ կան մամուլի դէմ: Գրաքննութիւն, դրամական երաշխաւորութիւն, տուգանք, խմբագիրների բանտարկութիւն, ևայլն, ևայլն, մամուլի ազատութեան դէմ ընդունւած սոլորական միջոցներն են:

Ընկերակցութիւնների ազսուքիւնը. — Ներկայ հասարակական կարգերի մէջ, անհատը միայնակ ոչ մի դեր չի կարող խաղալ: Նա հազիւ թէ կարող է զրազւել իր անձնական, սեփական շահերով, բայց այն ինչ որ կապւած է ընդհանրութեան հետ, քաղաքական, տնտեսական, ընկերային այն բոլոր հարցերը, որոնց լուծման համար հարկաւոր է հաւաքական ոյժ, նախաձեռնութիւն, անհատը անզօր է իր ինքնուրոյն ճիգերով ի գլուխ հանել: Դրա հա-

մար նա պէտք է իր ոյժերը միացնէ ուրիշների ոյ-  
ժերին: Իսկ դա կարելի է միայն կազմակերպական  
ձանապարհով, հաւաքական գործունէութեան ջան-  
քերով. մի խօսքով՝ ընկերակցութիւնների միջո-  
ցով: Որքան մի երկրի տնտեսական կեանքը զար-  
գացած է, որքան աճում է աշխատանքի բաժանու-  
ւրը, այնքան աւելի նւազում է անհատի սրտաղը-  
րական ոյժի նշանակութիւնը: Նոյնը կարելի է ա-  
սել և՛ քաղաքական կեանքի նկատմամբ: Որքան որ  
տարածւում են հաւասարութեան սկզբունքները,  
որքան որ աճում է ժողովրդի իշխանութիւնը, մի  
խօսքով՝ որքան որ ռամկավարութիւնը յաղթանա-  
կում է, նոյնքան անհատի խաղացած դերը նը-  
ւազում է: Տնտեսական և քաղաքական ասպարէ-  
զում անհրաժեշտ պէտք է զգաղւում հաւաքական  
նախաձեռնութեան, ընդհանուր գործունէութեան:  
Հետևաբար, քաղաքացիները պէտք է ազատ իրա-  
ւունք ունենան կազմակերպելու, իրանց ոյժերը  
միացնելու և հուաքականօրէն գործելու: Նրանք  
պէտք է ստեղծեն տնտեսական, քաղաքական ըն-  
կերակցութիւններ, որպէսզի միացեալ կերպով  
պաշտպանեն իրանց իրաւունքները: Բանւորները,  
օրինակ, պէտք է իրաւունք ունենան արհեստակ-  
ցական միութիւններ, գործակցական կազմակեր-  
պութիւններ հիմնելու, որպէսզի նրանց միջոցով  
կարողանան իրանց տնտեսական կացութիւնը բար-  
ւորել: Նրանք պէտք է իրաւունք ունենան նոյն-  
պէս քաղաքական հողի վրայ կազմակերպելու, որ-  
պէսզի Խորհրդարանի միջոցով կարողանան ընկե-  
րային բարեկարգութիւններ, քաղաքական իրա-  
ւունքներ ձեռք բերել:

Ընկերակցութիւնների ազատութիւնը ներկա-



յուս քոլոր ռամկալարական սահմանադրութիւն-  
ների կողմից ընդունուած է: Երկար ժամանակ, քա-  
ղաքական ընկերակցութիւնների կազմութիւնը ար-  
գիլուած էր, որովհետեւ այն սխալ կարծիքն էր տիրա-  
պետում թէ՛ կազմակերպուած կառավարութեան  
մէջ, քաղաքական ընկերակցութիւնը մինոր կա-  
ռավարութիւն կարող էր լինել: Փորձը ցոյց տւեց,  
սակայն, որ այնտեղ ուր սահմանադրական իրա-  
ւակարգ է հաստատոււմ, ուր հանրաքվով է ըն-  
տրուում օրէնսդիր խիսանութիւնը, քաղաքական  
խիսանու իւնը, քաղաքական ընկերակցութիւնը  
յեղափոխական միջոցների չի դիմում՝ իր նպատակ-  
ները իրագործելու համար: Ընդհակառակը, քաղա-  
քական մարմինների գոյութիւնը պարլամենտական  
կեանքի ներդաշնակ ու կանոնաւոր զարգացման  
համար քաղաքական անհրաժեշտութիւն է դառնում:  
Քաղաքական կուսակցութիւնները բիրտ ոյժի, զա-  
ւարթութեան դիմում են այն ժամանակ, երբ մի  
երկրում քաղաքական ազատութիւն գոյութիւն  
չունի: Բոնապետութիւնը բիրտ ոյժ է գործածում,  
որա համար էլ կուսակցութիւնները ապստամբական  
միջոցներ են գործադրում նրան տապալելու հա-  
մար: Կուսակցութիւնները, ուրեմն, պէտք է ա-  
զատ գոյութեան իրաւունք ունենան, որպէսզի օրի-  
նական միջոցներով հետապնդեն իրանց ծրագիրը:

Թիւրքիայում, սակայն, հակառակ նորադոյն սահ-  
մանադրական իրաւունքի սկզբունքներին, ընկերակ-  
ցութիւնների ազատութիւնը կաշկանդուած է: Մի  
կուսակցութիւն միայն ազատ քաղաքացիութեան ի-  
րաւունք ունի, այդ էլ «Իթթիհատ վէ Թէրագզը»  
կուսակցութիւնն է:

Ժողովների, Միջինների ազատութիւնը. — Սա

էլ քաղաքական ազատութեան էական պայմաններէ մէկն է : Քաղաքացիները պէտք է հաւաքուած և ժողովներ ղեկավարութիւն ունենան, որպէսզի կարենան իրանց կարծիքները տարածել ամենուրեք և և պաշտպանել իրանց շահերը : Առավարութեան գործ դրած ճնշումները ժողովների դէմ, խօսքի ազատութեան բռնաբարումը կը լինի : Շատ երկիրներում այժմ արգելւած են հրապարակաւ միտինգները, փողոցային հաւաքումները, բայց դա աւակալարարական սկզբունքներին բոլորովին հակառակ է . այդ տեսակէտից Անգլիան և Միացեալ-Նահանգները խիստ գովելի են . այնտեղ կառավարութիւնը ոչ մի արգելք չի դնում բացօդեայ միտինգների համար :

Թիւրք իայում միտինգների ազատութեան մասին խօսելը ուղղակի հեզնական է :

Խղճի ռազատութիւնը.— Սա ամենաբնական ու էական ազատութիւններից մէկն է : Որքա՞ն հալածանք, կոտորած եղել է կրօնի անունով, սկսած Հռովմէական կայսրութեան օրերից մինչև այսօր : Միլիոններ ի կը հառնեն այն բոլոր զոհերի թիւը, որոնք նախատակել են կաթօլիկ եկեղեցու հաւատաքնութեան շնորհիւ, ինչպէս և մահմէդական մոլեռանդութեան պատճառով : Բացի այդ, ո՞րքան ցեղեր, ժողովրդներ ու անհատներ զրկւել են քաղաքական, քաղաքացիական ազատութիւններից լոկ նրա համար, որ ընդունւած պետական, պաշտօնական կրօնը չեն դաւանել :

Կրօնական ազատութիւնը հռչակեցաւ Ֆրանսիական ցեղափոխութեան ժամանակ, որպէս մարտու և քաղաքացու անձեռնմխելի իրաւունքներից մէկը : 1791-ի սահմանադրութիւնը յայտարարեց,

Generated on 2016-07-15 11:11 GMT / http://hdl.handle.net/2027/uc1.ax0001605955  
 Public Domain, Google-digitized / http://www.hathitrust.org/access\_use#pd-google

որ «Լիմեն ոք աղատ է իր կրօնական կարծիքները համար» : Այնուհետև բոլոր սահմանադրութիւնները ընդունեցին այդ սկզբունքը :

Նորագոյն սահմանադրական իրաւունքը կրօնը նկատում է որպէս անհատական խղճի գործ : Պետութիւնը, համաձայն այդ սկզբունքի, ոչ մի իրաւունք չունի միջամխելու կրօնական խնդիրների մէջ : Եկեղեցին պէտք է լիովին անջատ լինի պետութիւնից և իր գոյութեան միջոցները ապահովէ միմիայն հաւատացեալների հայթայթած օժանդակութեամբ : Գոյութիւն ունեցող դաւանութիւնները հաւասարապէս պէտք է ազատ լինեն և պետութիւնը չպէտք է իր ելեմուտքից նիւթական նպաստ հայթայթէ նրանց : Նա ով որ հաւատում է, ազատ է իր կրօնական կարծիքների մէջ և կարող է բարոյապէս ու նիւթապէս օժանդակել եկեղեցուն : Իւրաքանչիւր դաւանութիւն, ուրեմն, կախւած պէտք է լինի իր ծխից :

Եկեղեցու և պետութեան բաժանման սկզբունքը ներկայումս մեծ յառաջադիմութիւն է անում : Միացեալ-Նահանգներում նա երկար ժամանակից ի վեր արդէն գործադրւած է . Ֆրանսիայում նա կիրարկւեցաւ 1905ին և կամաց-կամաց միւս երկիրներն էլ հետեւելու քն սրանց օրինակին :

Պարզելով նորագոյն սահմանադրական իրաւունքի մի շարք սկզբունքները և հրաւիրելով ընթերցող հասարակութեան ուշադրութիւնը այդ սկզբունքների վրայ, մանրամասն ուսումնասիրութեան նիւթ դարձնելով նրանց, մենք՝ վերջացնելուց առաջ՝ կարևոր ենք համարում շեշտել մի ան-

վիճելի ճշմարտութիւն, այն, որ մի երկրում ձեռք բերած սահմանադրութիւնը այնքան կեանք կարող է ունենալ և յարասել, որքան նոյն երկրի ժողովուրդը գիտակցութիւն ունի նրա մասին, և օգտւում է նրա տւած բարիքներից. այլապէս, առանց այդ անհրաժեշտ կանխապայմանի, սահմանադրութիւնը ուշ կամ կանուխ դատապարտւած է մեռնելու և կամ թղթի վրայ միայն ապրելու, առանց կեանքի մէջ գործնական արդիւնքներ տալու: Որպէսզի սահմանադրութիւնը ապրի և զարգանայ, հարկաւոր է որ նա հասարակական լայն խաւերի սեփականութիւնը դառնայ, որ ժողովուրդը քաղաքական ազատութիւններին տայ կենսական նշանակութիւն, իբրև անմիջական անհրաժեշտութիւն, հսցի եւ շոյսի չսպի: Երբ քաղաքական-քաղաքացիական ազատութեան գաղափարը խոր արմատներ կը ձգէ ժողովրդական հոծ զանգւածների մէջ, երբ ուսման վարական ազատ բարքերը աւանդական կերպով ներմուծեն, թափանցեն երկրի ամենահեռուոր անկիւններն անգամ, այն ժամանակ արդէն վստահօրէն կարելի է ասել, որ սահմանադրական դրութիւնը կապրի ու կը զարգանայ ճշմարիտ ու կատարեալ ժողովրդապետութեան հիմունքներով, երաշխաւորելով իսկական ազատութեան, հաւասարութեան ու եղբայրութեան դարախզիսի պանծալի յաղթանակը:









